

FAASOLOGA O MATAUPU MO ASO SA TAITASI - 2020

IANUARI

26 - O LE FEAGAIGA MA LE ATUA

FEPUARI

2 - PESE MO LE AUAUNA – O AI LEA AUAUNA?

9 - O PEROFETA LAITI O LE TUSI PAIA – HOSEA

16 - PE A TATOU TATALO – Mataio 6:9-13

23 - O LE TEKENALOSI – Technology - debate

MATI

1 - LOU VALAAUINA NE'I VALETU'ULIMA

8 - O LE TUSI A LE PEROFETA O IOELU

15 - E PĒ LE AFI AE OLA PEA LE MAGĀLAFU

22 - O LE VAI O IORITANA

29 - O LE TUSI A LE PEROFETA O AMOSA

APERILA

5 - O LE PAMA MA ONA LAU

12 - O LE OLA SAUĀINA

19 - O LE TUSI A LE PEROFETA O OPETAIA

26 - AISEĀ UA LĒ FIAFIA AI SOTOMA IA LOTA – Kenese 19:1-11

ME

3 - AUA NE'I OUTOU POPOLE – Mataio 6:25-34

10 - O TINA O LE TALALELEI

24 - UA LĒ FIAFIA LE PULE O LE TAUSAMAAGA – Ioane 2:1-11

31 - O LE TUSI A LE PEROFETA O IONA

IUNI

7 - E MANATUA FAAPEFEA LOU TAGATA?

14 - IA TOE TIMATA LE UPEGA – Salamo 131

21 - “A OU TE FAI ATU AI IA TE OUTOU” – Mataio 5:21-48

28 - O LE TUSI A LE PEROFETA O MIKA

IULAI

5 - FAATALITALI I LE TAIMI O LE ALII

12 - TINA I LE GAFA O IESU – Mataio 1:1-17

19 - O MANU FEAI NA ILOA E TANIELU

26 - O LE TUSI A LE PEROFETA O NAUMA

AOKUSO

2 - TUSI A LE APOSETOLO O PAULO IA ROMA

9 - O LE FALE MA LE ANOFALE

16 - E PULE LAVA LE ATUA

23 - O LE TUSI A LE PEROFETA O SAPAKUKA

30 - E LEAGA LE TUPE – debate

SETEMA

- 6** - **IESU SA TAMAOAIGA, A UA FAAMATIVAINA – 2 Kor 8:8-15**
- 13** - **O LE TUSI A LE PEROFETA O SEFANAIA**
- 20** - **E LĒ FALALA FUA LE NIU**
- 27** - **O KAINO MA LE ATUA – Kenese 4:8-16**

OKETOPA

- 25** - **SUESUEGA I LE TUSI O IOSUA**

NOVEMA

- 1** - **O LE TUSI A LE PEROFETA O HAKAI**
- 8** - **E A LE UGA E TAUSILI AE TIGAINA AI LE ATIGI**
- 15** - **ONOSAI I FAAOSOOSOGA – Iakopo 1:12**
- 22** - **O LE TUSI A LE PEROFETA O SAKARIA**
- 29** - **O LE TUSI A LE PEROFETA O MALAKI**

TESEMA

- 6** - **O FIAFIAGA O LE KERISIMASI**
- 13** - **O LE A SAU MEAALOFA MO LE PEPE O LE KERISIMASI?**

Aso Sa: 26 Ianuari 2020

Mataupu: O LE FEAGAIGA MA LE ATUA

O le FEAGAIGA o se maliega/tautinoga ua aloaia (formal agreement), i le va o ni tagata poo ni faalapotopotoga - nuu, atunuu, ekalesia, fale faigaluega ma isi. O soo se feagaiga e faia, e tatau ona i ai ni tulafono e puipuia ai le feagaiga ina ia manuia.

I le amataga o galuega faale-Autalavou o lenei tausaga, ua manatu e taua le toe faamanatu o mea nei:

1. O le tatou feagaiga ua faia i luma o le Atua e ala i le avea o i tatou ma sui auai o le Autalavou 2020.
2. Ia toe iloilo tulafono o loo taiala ai galuega o lenei tausaga poo talafeagai ma suiga ua i ai le soifuaga.
3. **O le fesili: E faapefea ona faatumau a tatou feagaiga ma le Atua?**

Faatinoga o le Mataupu:

1. Ia fesili i sui Autalavou po o a ni tulafono o lima taitaiina ai lo latou valaauina: fale faigaluega, aoga, tausi aiga.
 - a. O a vaivaiga o ia tulafono poo ni itu e lelei mo oe le tagata valaauina?
 - e. O a ni faiga e toe faaleleia atili ai ia tulafono mo le manuia o feagaiga ua faia?
2. I le avea ma sui Autalavou 2020—
 - a. O a tulafono o taitai ai galuega a le Autalavou?
 - e. E i ai ni taiala e ono suia pe faaopoopo?
 - i. O tatou faamaoni ona tausi aiaiga ma tulafono a le Autalavou?

Fesoasoani mo le Mataupu:

O le feagaiga a le Atua ma Isaraelu, o loo manino ai le Silisili Ese o le Atua ma le faatauvaa o Isaraelu. O le Feagaiga na lima taitaiina e tulafono e sefulu (10) e pei ona tuuina ifo ia Mose i le Mauga o Sinai/Horepa.

E eseese ituaiga Feagaiga o loo iloa i le soifuaga lenei. O isi taimi, e tau fai tutusa itu e lua le malolosi (pule i le pulē/tautua i le tautua). O nisi o taimi, ua malosī le isi itu (pule) ae vaivai le isi itu (tautua). E manatu le tatou mataupu, o tulafono e 10, o tulafono ia e tatau ona taiala ai tulafono ma alafua ua tatou faataoto mo le manuia o a tatou Feagaiga ua faia i luma o tagata ma le Atua. Ia manatua, o le mau tauave a le Autalavou: **IA OLA IA KERISO**. O lona uiga, ia tatou ola i tulafono ma aoaoga ua aoa mai e Keriso.

O le faamoemoe o lenei mataupu (1) ia avea le manatua o Feagaiga ua faia i luma o le Atua e fai ma ala tatou te faaeteete ai ma mataala i le faatinoina o lo tatou valaauina. (2) Ia avea le manatua o le Feagaiga i luma o le Atua e fai ma ala o le faamaoni, lototele, faamalosi ma ola finafinau mo le lelei o le valaauina ae sili ai ona viia le Atua, e ana le valaauina. Ia manuia feau faale-Autalavou o lenei 2020.

Faamanatu: O i tatou o tagata o le Feagaiga ma le Atua

Aso Sa:

2 Fepuari 2020

Mataupu: PESE MO LE AUAUNA – O ai lea Auauna?

E fa (4) Pese mo le Auauna – (Servant Songs) o loo taua i le tusi o Isaia:

(1) Isaia 42:1-7 (2) Isaia 49:1-6 (3) Isaia 50:4-7 (4) Isaia 52:13-53:12.

O Pese nei e fa (4) o loo faamatala ai foliga vaaia o le Auauna ua filifilia ma valaauina e le Atua mo le Faaolataga o Isaraelu. Ua talia lautele, o le Auauna o loo faasino ia IESU KERISO ma lana misiona na afio mai ai i le lalolagi. Peitai, o loo teena e nisi lea talitonuga ona o nisi o mafuaaga.

Sini o le Mataupu:

1. Ia malamalama le Autalavou i mafuaaga ua teena ai Iesu, o le Auauna Filifilia.
2. Ia saga faamautuina, O IESU, o le Auauna ua filifilia e le Atua.

Faatinoga o le Mataupu:

E fautuaina le vaevae o le Autalavou i vaega e fa (4). Tofu le vaega ma le Pese e faitau ma tali i le fesili o loo faaautu i ai le mataupu.

Fesoasoani mo le Mataupu:

O le aotelega o le tusi o Isaia, ua mafai ona vaevaeina i vaega tetele e tolu:

(1) *Isaia 1-39*: o le taimi e le'i alu le tafeaga (Pre-exilic) poo le *Isaia o Ierusalem*. Taimi o loo galue Isaia mo le malo o Iuta i le seneturi lona valu (eighth century). O tusitusiga o loo faamauina ai mafuaaga o le faatafea o le nuu. O le tafeaga e mafua ona o le nuu ua agasala. Ua leaga ta'ita'i o le nuu. Ua lē usiusitai le nuu i le Feagaiga na osi ma le Atua.

(2) *Isaia 40-55 – Deutero- Isaiah*: taimi o faatafea le nuu i Papelonia i le vaitau o le seneturi lona ono (sixth century). E tolu vaega taua ia e aofia i le vaega lona lua – Deutero- Isaiah:

1. O upu faamafanafana i le nuu ona o mafatiaga o loo feagai ma i latou.
2. O loo i ai faatasi le Atua ma le nuu i le tafeaga.
3. E i ai le – *AUAUNA* na te faasaoloto le tafeaga.

(3) *Isaia 56-66*: o tusitusiga ua toe foi le tafeaga (Post-exilic). O le faamoemoe o le toe faafoisia o le tafeaga, lea ua tino ma faataunuaina. O loo taoto i ia tusitusiga upu faalaeiau ma le toe faamanatu, ina ia tumau i le Atua ae lē o le femoumouai.

O PESE MO LE AUAUNA – SERVANT SONGS

E mau eseele le au suesue o le Tusi Paia i le tali o le fesili – **Po o ai le Auauna** o loo faatatau i ai le pese. O le upu *Servant* i le gagana Eperu – *ebed* e faatatau i soo se auauna: tupu, perofeta, pologa ma soo se tagata. O le isi mafuaaga lea ua faigata ai ona maua se tali o le fesili, ona o le upu o loo faasino i soo se tagata.

O ai lea Auauna?

1. Iakopo/Isaraelu: I le lomiga Eleni o le Feagaiga Tuai (Septuagint) o loo faamauina ai o le Auauna o loo faasino ia **Iakopo/Isaraelu**. O nisi o tusi o loo faavae ai lenei fianuga, e aofia ai: Isa 41:8-9; 42:19; 43:10; 44:1-2, 21; 45:4; 48:20.

O loo mafai foi ona iloa le fesootaiga o Isaraelu ma le Auauna Filifilia a le Atua i le: Isa 41:8-13 ma le Isa 42:1-6.

- i. O le Atua na filifilia – Isa 41:8-9 ma le Isa 42:1

- ii. O le Atua na faatumauina – Isa 41:10 ma le Isa 42:1
- iii. O le Atua na valaauina – Isa 41:9 ma le Isa 42:6
- iv. O le Atua e taofimauna - Isa 41:13 ma le 42:6.

Peitai, o loo faamauina foi eseesega o le Auauna filifilia ma Iakopo/Israelu. Isaia 42:19 o loo faamatalaina ai o Israelu o le auauna tauaso ona o agasala (42:19). Ao le Auauna ua filifilia e le Atua, o loo taua i le pese, na te faapupula mata o tagata ua tauaso ona o le agasala (42:7).

2. Tagata se toatasi (an individual) ae lē o le nuu o Isaraelu: O loo faavae lea finauga i faaupuga o loo faamatala ai le Auauna: i lona valaauina, o lona aoaoina, o lona malosi mai le Atua, o ona mafatiaga seia oo ina oti. O nisi ua manatu i le galuega faaperofeta, tupu ma augatama ua tuanai. Peitai, o le Auauna o loo taua e Isaia, o le Auauna o loo faatalitali i le lumanai. O loo finau nisi, o le Auauna, o loo faasino i le tupu o Kuresa i lona valaauina: Isaia 45. Peitai, o loo tetee nisi, ona o Kuresa o le Auauna sauā ma le malosi, ao le Auauna ua filifilia, o le ū gapēpē.

3. Perofeta o Isaia: O loo faamatalaina le auauna, o se tagata o loo soifua i le taimi o le tafeaga. O le tagatānuu o Isaraelu, ma ua valaauina e le Atua e galue faamisionare i le taimi o feagai le nuu ma mafatiaga. Peitai, e tele foi eseesega o Isaia ma nisi o faamatalaga e faatatau i le Auauna Filifilia.

4. Iesu Keriso: I le Aotelega o mafaufauga ma finauga a le au suesue o le Tusi Paia, ua talia lautele ai lava – O le Auauna o loo taua i pese e fa (4) – O Iesu Keriso. O faamatalaga eseesega o le Auauna, e fesootai uma lava le soifuaga ma le galuega a Iesu na faia i le lalolagi nei. O puapuaga ma mafatiaga na feagai ma Iesu, o puapuaga ia o loo faamatalaina e oo i ai le Auauna filifilia. O le faaolataga na saunia e Iesu, o le faaolataga mo tagata uma, e le na o se tagata poo se nuu se tasi.

Faamanatu: O ai lea Auauna? – O IESU KERISO

Aso Sa: 9 Fepuari 2020

Mataupu: O PEROFETA LAITI O LE TUSI PAIA - HOSEA

E sefulu lua (12) tusitusiga faaperofeta o le Tusi Paia, ua faaigoaina o *Tusitusiga a Perofeta Laiti (Minor Prophets)*. E aofia ai: Perofeta o Hosea, Ioelu, Amosa, Opetai, Iona, Mika, Nauma, Sapakuka, Sefanaia, Hakai, Sakaria ma Malaki. Ua faaigoaina o Perofeta Laiti, ona o tusitusiga e pupu’u mataupu o faamauina ai.

A’o le galuega faaperofeta, e lē itiiti lona taua i le tala faasolopito o Isaraelu. O le galuega Faaperofeta e Ogototonu i le SALAMŌ o le tagata. A Salamō ma fo’i i le Atua, e maua le manuia. A’o le tete’e i le Atua, e i’u i le faafanoga.

I le tusi Aoga o lenei Tausaga 2020, ua faamauina ai nisi o vaaiga lautele e ao ona tatou iloa e faatatau i nei tusitusiga faaperofeta.

Faatinoga o le Mataupu:

1. Mo le faasologa o Mataupu i Aso Sa taitasi mo Perofeta Laiti, ua fautuaina le faia o ni kopi pe faaoga OHP e faitau ai e le Autalavou.
2. Ia tatala pea le avanoa e faasoa ai le Autalavou i nisi o mataupu e fia malamalama ai i le Tusi pe a talanoaina.
le fesoasoani ua saunia mo mataupu taitasi.

O LE TUSI A LE PEROFETA O HOSEA

O le uiga o le igoa Hosea – *Faaola*. O lona tamā o Peri (1:1). Sa galue Hosea i le malo i mātū – Isaraelu pe tusa o le TLM 755-725, a’o avea Ierepoamo ʻʻ ma tupu ia Isaraelu. O loo i ai le tailtonuga, o Hosea o le tagatanuu o Isaraelu, e ui e lē o tele ni faamatalaga i lona tupuaga. Peitai, o faaupuga o le tusi ma le silafia lelei e Hosea o mea o loo tutupu i le siosiomaga o Isaraelu (Samaria: 7:1; 8:5-6; 10:5, 7; 13:16, Isereelu: 1:5, Kilikala: 4:15; Mesepe: 5:1; Kipea: 5:8; 9:9, Petavene: 10:5), ua manatu ai le toatele o tagata suesue: o Hosea o le tagatānuu Isaraelu.

1. Hosea ma lona valaauina: Hosea 1-2, o loo faamauina ai le valaauina e le Atua o Hosea e faaiipoipo ia Komeri le fafine talitane. O le fanau foi a Hosea, ua faaigoaina o fanau a le faitaaga. E tulaga ese le valaauina o Hosea mai le tele o Perofeta o le Tusi Paia. I le talitonuga, e lē fiafia le Atua i le talitane. E lē finagalo foi le Atua e ta’ua i tatou o ni fanau a le faitaaga.

O le fesili: *Aisea ua faapea ai le valaauina o Hosea?* O le valaauina o Hosea e faaiipoipo ia Komeri le fafine talitane, o loo aumai i se ata faafaatusa. Ua faatusa ai le *Atua ia Hosea, ao Komeri, o Isaraelu*. O uiga talitane o Komeri, ua faatusa i ai uiga talitane o Isaraelu, e lē gata o le tino ae faapea foi i le itu faaleagaga (2:16). O le faatonuga mo Hosea e faaiipoipo ia Komeri tusa lava pe talitane, o le ata atoa lea o le Tusi a le Perofeta o Hosea: *O le Alofa o le Atua ia Isaraelu – tusa lava pe gauai lona loto i isi atua mamate*.

2. Feau Faaleagaga o loo Ogototonu i ai le Tusi - central themes: O le tusi o Hosea, o loo ogototonu i le **ALOFA o le Atua**.

1. Alofa Faamaoni: O le feau tupito lava o tusitusiga nei faaperofeta e aofia ai ma Hosea, o se taualaga i tagata o le Atua, e faailoa le toasa o le Atua, ona o le agasala ua faia. Peitai, o le faaiuga lava o ia folafolaga o le toasa o le Atua, o loo i ai ma le avanoa e mafai ai ona sao mai le tagata mai lea toasa o le Atua, pe afai e salamo le tagata ma toe foi i le Atua e faia lona finagalo paia (1:10-21, 3:5, 2:16-23, 14:1-7). O le alofa faamaoni o le Atua ia Isaraelu, o loo atagia i lona naunau pea e faatumauina le feagaiga na osi ma ona tagata. Ua lē amanaia ai uiga faatalitane o Isaraelu ae ua faamuamua pea lona alofa i ona tagata.

2. Alofa Faamagalo o le Atua: O le alofa faamagalo o le Atua, e afua ai ona toe maua le avanoa o le tagata e saili atu ia te Ia ma le loto ua salamo faamaoni. E faapei ona faia e Nineva ma ona tagata, na salamo ma faatoga i le Atua na salamō ai foi le Atua mai lona toasa.

Faamanatu: E lē faatuaomia le alofa o le Atua

Aso Sa: 16 Fepuari 2020

Mataupu: PE A TATOU TATALO – Mataio 6: 9-13

O le tatalo, o le telefoni i le lagi. O le ala tatou te fesootai ai i le Atua. E tolu vaega ua aoaoina i tatou e faavasega i ai le tatalo:

(1) Viiga & Faafetai, (2) Faatoesega (3) Manaoga.

Ua matauina i nei aso, ua toatele tupulaga talavou **e lē iloa tatalo.** Ua mafai ona iloa lea vaivaiga, i upu e faaaogaina pe a tatalo.

Sini o le Mataupu:

1. Ia aoaoina ma toe faamanatu vaega o le tatalo. E aofia ai: le faasologa o manatu ia sosolo lelei i le faalogo ma mulimulita'i i ai tagata uma.

2. Ia iloa foi faaupuga e lē tatau ona faaaoga i tatalo, ona o uiga lē talafeagai ma le fesootai atu i le Atua.

Faatinoga o le Mataupu:

Ia fesiligia le Autalavou, poo a ni aafiaga o le agaga tapuai pe afai e lē sologa lelei upu ma faaupuga o le tatalo. Ao a foi ni itu lelei, o se tatalo ae manaia upu i le faalogo.

Fesoasoani mo le Mataupu:

(1) E i ai le manatu, e pule a le tagata ia i le faasologa ma upu o lana tatalo. Peitai, e tele le aafiaga o le agaga tapuai o le tagata pe afai e feosoosofa'i solo ma lē sologa lelei manatu faaalua o se tatalo. O nisi o taimi, ua uumi tatalo ma le fia faalogo i ai se tagata. O le isi itu taua, afai o le tatalo e amata ai se fonu, e tatau lava ona faapitoa le tatalo mo le fonu. Afai o se tatalo e amata ai aoga pese, e tatau foi ona faapitoa le tatalo mo le amataina o pese. Afai o le tatalo e faapaia ai le sene, e tatau foi ona faapitoa upu e faaaoga mo le faapaiaina o le sene.

(E fautuaina se fesoasoani mai le Susuga i le Faafeagaiga ma Faifeau mo ni faaupuga masani mo tatalo eseese e pei ona taua i luga.)

(2) O Faaupuga ma Alagaupu Faasamoa e faaaoga i tatalo.

O le upu masani a le Atunuu: E tala lasi le atunuu. E uiga lasi foi upu ma faaupuga. O nisi o taimi ua faaaoga alagaupu ma muagagana e faaupu ai tatalo. Peitai, o le manumanuga, ona o upu e uiga lasi. O nisi o faaupuga, e lē lelei ona mafuaaga.

Faataitaiga:

1. *“I’e e taatia i malae i lou silasila mai”* – O le ie e taatia i malae, o le ie e iloa ai le teinemuli poo le teine faatoa nofotane. O lona uiga, e maaleale le mafuaaga, e lē tatau foi ona faaaogaina i tatalo.

2. *“O loo maualuga le aoina o le masina”* – o le faaupuga e faamatala ai le maualuga o le tausiga a le Atua, o loo manuia ai tagata uma. Peitai, e ese foi lona mafuaaga.

3. Faaogaina o le upu – *Faamolemole* - e mau eseese tagata i le faaaogaina o le upu faamolemole i taimi o tatalo. E i ai le talitonuga, o le va nonofo o i tatou o tagata faatuatua ma le Atua, e lē faatauanauina le finagalo o le Atua e ala i le upu – faamolemole. Peitai, o lo tatou ole atu ma faatoga i le loto ua maualalo, o le mea sili lea. A faafofoga i tatalo i taimi o tapuaiga EFKS, e seāseā faaaogaina le upu – Faamolemole.

(E fautuaina se fesoasoani mai le Susuga i le Faafeagaiga ma Faifeau mo ni faaupuga masani mo tatalo eseese e pei ona taua i luga.)

(3) Faasologa o tatalo: E le tele se fesoasoani i le faasologa o tatalo. Pau le itu taua, ia sologa lelei faaupuga e faaaogaina ina ia malie i le faalogo ma ia mulimulita'i atu tagata uma i lau tatalo.

(a) Tatalo Faafetai: O soo se tatalo lava, e muamua le viiga soo ai ma le Faafetai. E pule lava le tagata ia i le faasologa, ae ua fautuaina vaega mulimuli nei e tolu, ia manatua pea pe a fai le tatalo:

(1) Faafetai ma le Tusi Paia, (2) Faafetai mo le Agaga Paia, (3) Tatalo mo le Faaolataga na saunia e ala ia Iesu Keriso

(e) Tatalo le Faatoesega:

Ia auna nei galo ona faatoga ina ia faamagaloina i tatou i le toto o Iesu Keriso na faamaligiina.

(i) Tatalo o Manaoga:

Ia manatua le tatalo mo tagata mamai ma tagata faanoanoa.

(E fautuaina se fesoasoani mai le Susuga i le Faafeagaiga ma Faifeau mo ni faaupuga masani mo tatalo eseese e pei ona taua i luga.)

Faamanatu: Ia tatou fiafia e tatalo i le Atua i taimi uma.

Aso Sa: 23 Fepuari 2020

Mataupu: O LE TEKENALOSI – Technology - debate

O le mataupu o lenei aso, o le FINAUGA – debate, e faatatau i le manatu autu ua filifilia. O nei aso, ua saosaoa le faaaogaina o le tekenalosi. Ua toeitiiti vaega uma o le olaga ua faatekenalosi.

O le finauga, o le a vaevae ai le Autalavou i vaega e lua:

Vaega Ioe – E lelei le Tekenalosi

Vaega Tetee – E leaga le Tekenalosi.

Fesili Autu: O a ni aafiaga o tapuaiga ma le ola faaleagaga ona o le Tekenalosi?

Fesoasoani mo le Finauga:

Itu Ioe: E lelei le tekenalosi ona o itu nei:

1. vave ai fesootaiga ma femalagaiga
2. fesoasoani tele i meaaoga a fanau
3. faigofie galuega ma alamanuia mo tagata uma
(ma nisi mafuaaga o silafia)

Itu Leai: E leaga le tekenalosi ona o itu nei:

1. faatupulaia faalavelave e aafia ai le fanau
2. tele vaaiga mataga faaneionapo ua iloa e fanau mai tekenalosi
3. Ua aafia ai le va nonofo fanau ma matua – leai se faaaloalo
4. Ua aafia faiga masani o le ola vivii i le Atua.

(ma nisi mafuaaga o silafia e le Autalavou)

Mo le Ola Faaleagaga: E i ai itu lelei o le Tekenalosi e pei:

1. instruments mo pese
2. Overhead Projector mo le faalauiloaina o pese ma le faasologa o le lotu
3. Faaaogaina o le sound system e faaleotele ai sauniga ma pese

O itu e lelei ai:

1. ua avea le manaia o ata o le Projector ua matamata ai i ata ae le faalogo i le lotu.
2. ua faaoga instrument mo pese ae lē faaogaina le taleni ta piano.
3. E i ai taimi e faaletonu ai le sound system ma faatiga taliga ao faagasolo le lotu.

Faamanatu: Faaaoga tatau le Tekenalosi

Aso Sa: 1 Mati 2020

Mataupu: “LOU VALAAUINA NE’I VALETU’ULIMA”

Ua molimauina le faatupulaia o tupulaga ua valetu’ulima o latou valaauiina ona o nisi o mafuaaga e pei:

1. Manao ia tele tupe e faamalie ai fiafiaga o le olaga.
2. Lē faamaoni (fai togafiti, pepelo).
3. Ava malosi ma fualaauiina faasaina.
4. Ola faamaualuga i le va ma tagata.
5. Ola tetee i faatonuga a e ua fai ma taitai.
6. Faalavelave o le aiga ma isi.
7. Faaaoga le poto ma le iloa e fai ai auala sese e maua ai tupe

(ma nisi mafuaaga e mafai ona faailoa mai e le Autalavou)

O le faamoemoe o lenei mataupu, ia tatou talanoa ma faasoa i mafuaaga ua taua i luga, ma saili poo a ni vaifofo o ia faafitauli.

Faatinoga o le Mataupu:

1. E fautuaina le faamatala o mafuaaga ua taua i luga ma faaali i ai finagalo o le Autalavou. Ia saunia pea lau Susuga i le Taitai e tuufatasi tali a le Autalavou ina ia maua se aoaoga taua o lenei mataupu.

Fesili Autu: Aisea e mafua ai ona oo le tupulaga talavou i ia vaivaiga?

Ia aofia i le talanoaga aafiaga o fanau ua lē fiafia i le lotu, o fanau ua faigaluega e lei oo i le taimi latou te uuina ai ni tupe, o fanau ua fiafia e fai uo i isi tamaiti e ese tapuaiga, ese foi aoaoga o loo aoaoga ai. Silasila ane i le fesootaiga o le ola faaleagaga o talavou ma le ola faaletino poo gafea lea e malosi mai ai le tiapolo).

Nisi o tagata mai le Tusi Paia ua valetuulima lo latou valaauiina.

e. Ioelu 2:19-3:21 – o loo faamauina ai faamanuiaga e maua e le nuu, ona o le alofa o le Atua ia i latou pe afai e salamo ma toe foi i le Atua.

O le feau tupito o loo taumafai Ioelu e momoli atu mo le nuu o le Atua, o le Salamō ma toe fo’i i le Atua e maua ai faamanuiaga e tele.

Faamanatu: Salamō Faamaoni

Aso Sa: 15 Mati 2020

**Mataupu: E PĒ LE AFI AE OLA PEA LE MAGĀLAFU
– 2 Samuelu 1: 24-27**

O magālafu – o malala ola o le afi. O malala ola e masani ona tanu/ufiufi i le lefulefu mo le isi taimi e toe faaola ai le afi. O le mafuaaga lea o le upu: E pē le afi ae ola pea le magālafu. O upu e mafai ona faaoga e faamatala ai se tagata lelei, i ni ona uiga lelei e fai ma faaitaiga lelei mo isi.

O le mataupu o lenei aso, o le a tatou sailiili ai i le fesootaiga o le tala ua filifilia ma le manatu autu.

Faatinoga o le Mataupu:

1. Ia talanoa le Autalavou i le uiga o fuaiupu taitasi: Fuaiupu 24-27.
2. O le a se fesootaiga o le Manatu Autu ma le tala ua filifilia?

Fesoasoani mo le Mataupu:

f.24- Ua manatu Tavita, e tatau le faanoanoa o Isaraelu ona o le maliu o Saulo ma lona atalii o Ionatana. O tagata na matua iloga lo latou sao i le manuia o Isaraelu. Lea ua tautino ai Tavita: sa na faaofu ia te outou i ie mūmū, atoa ma mea faafiafia; na ia teuteua o outou ofu i auro e matagofie. O mea taugata ma mea anagata (ie mumu, auro matagofie) na sapi ai Isaraelu ona o Saulo. O taimi fiafia, e lē maua gofie aua o taimi ia o taua, peitai, ua na o taitaiga lelei, e lagona ai e tagata le fiafia.

f.25 – O le vaai a Tavita ia Isaraelu ma lona tulai mai e fai ma tupu, e leai lava se isi e tutusa o la loto ma Saulo. E moni lava i vaivaiga Saulo e pei ona iloa i nisi o taimi, peitai, o uiga lava ia o le tagata saili malo. O nisi o taimi,ua fai lava faaiuga i lona lava iloa ma lona atamai ae fesili mulimuli i le Atua.

*f.26-*Ua tautino le solo a Tavita, i le la mafutaga mafanafana ma Iotana. Manatua foi, o Iotana le atalii o Saulo, na ia laveaiina Tavita mai le ita ma taupulepulega a lona tama o Saulo. Fai mai Tavita; sa maeu lava lou alofa ia te au, e sili i le alofa o fafine – **Talanoa le Autalavou pe aisea ua faatusa ai e Tavita le alofa o Ionatana i le alofa o le fafine.**

f.27- “Aue! ua maliliu toa ua maumau auupega o le taua” O auupega o loo taua e Tavita, o auupega o le taua – tao, pelu, talita ma isi. I le manatu o Tavita, ua leai, leai lava se isi e mafai ona ia toe faaogaina auupea na tau ai Saulo ma lana fanau. E ui o loo i ai lona atalii pipili o Mefiposeta. O upu e masani ona faaoga i taimi o upu faamafanafana i maliu. O upu e faamatala ai se tagata aoga ua maliu pei o Saulo. Peitai, o auupega e pei ona taua e mafai ona faamatala ai

Aso Sa: 29 Mati 2020

Mataupu: O LE PEROFETA O AMOSA

O Amosa o le faifaatoaga – fagamanu ma le galue i sukamoru (7:14) mai le nuu o Tekoa i le malo o Iuta (southern kingdom). Na valaauina e le Atua e galue faaperofeta mo le malo o Isaraelu (northern kingdom) i le vaitau o le TLM 800 -750. O le Perofeta o le seneturi lona valu – eighth century.

E logologoa tala o le galuega a Amosa i lona naunau ia iloa le amiotonu o tagaa Isaraelu i soo se mea. O le faafitauli ua tulai ma ia Isaraelu, ua aliali ma mu saesae faiga amioletonu ua aafia ai agafesootai mo le nofolelei o tagata i aso uma (social injustice). O ia faiga le sa’o e aofia ai:

1. Faaiuga amioletonu a Faamasino (2:6a)
2. Faatau tagata e faamaonia ai ni nonogatupe itiiti (2:6e)
3. Faiga faapito ma faiga matape’ape’a a tagata mauoa (4:1-3)
4. Ua latou faasese ai tagata matitiva. Ina ua tele atu le faasiliga o fefaatauaiga latou te maua i loo le tau sa’o e tataua ona maua e tagata (8:5-6)
5. O tapuaiga ua leai se uiga e fai ai. Ua papa’u (hollow) ma ua fai o se mea ua tau ina faataunuu. Ae leai se agaga moni o fai ai tapuaiga ma ofoina ai le taulaga i le Atua Soifua. Ae mafua ia mea, ona ua fefiloi faatasi faiga o tapuaiga i le Atua Soifua ma faiga o tapuaiga i atua mamate o Kanana (syncretism) - (5:21-24).
6. E lē o atagia i le olaga o aso uma le ola tapuai i le Atua.

O le manatu a Amosa, o le ola tapuai faamaoni i le Atua, e lē o le ave o taulaga mu ma tausii i poloaiga, ae o le ola ma faatino le finagalo o le Atua e ala i le faia o faaiuga sa’o ma faiga amiotonu mo tagata uma.

O le naunautaga lava o le Perofeta ma le feau momoli mo Isaraelu, ia salamo tagata uma ma liliu ese mai faiga amioletonu o loo ola ai ae toe fo’i i le Atua e faasaoina ai i latou mai lona toasa (5:4-6). O tapuaiga foi o loo fai tau ina faataunuu, ia faia ma le loto atoa i ai. O taulaga e ofoina, ia ofoina ma le loto atoa ina ia maua ai se viiga o le Atua ae le o le tagata.

Faamanatu: Ola i le amiotonu a le Atua

Aso Sa: 5 Aperila 2020 –Aso Sa - Lau Pama

Mataupu: O LE PAMA MA ONA LAU

O le Aso Sa lenei o le Lau Pama, o le aso ua faamanatu ai le malaga faatupu a Iesu i Ierusalem e pei ona faamauina – Mataio 21:8, Ioane 12:13. O le mataupu o lenei Aso, o le a tatou sailiili ai i nisi aoga o le Pama ma ona Lau

Tuu pea le avanoa i le Autalavou poo a ni aoga o le Pama ma ona Lau o silafia.

Fesoasoani mo le Mataupu:

O le laau o le Pama, o se laau e tupu olaola – flourish. E oo atu i le 40-80 ft lona umi. O ona lau e oo atu i le 6-12 ft le umi. O le laau e tupu tele i Ieriko e oo atu i Soara – Teuterenome 34:3, Faamasino 1:16, 3:13.

E tele aoga o le Pama ma ona Lau e pei ona taua i le Tusi Paia:

- (1) e faaoga i aso o le Tausamiga o Fale Apitaga – Lev 23:40
- (2) o le faailoga o le manumalo – Faaaliga 7:9
- (3) fausia ma teuteu ai puipui o fale tapuai – 1 Tupu: 6, 2 N/tupu: 3
- (4) faatusa i ai le tagata amiotonu – Salamo 92:12

“E tupu olaola le tagata amiotonu e pei o le pama....”

O le fesili: **Aiseā ua faatusa ai le tagata amiotonu i le Pama?**

Faatinoga o le Mataupu:

E fautuaina le talanoa faatasi. Ia faailoa se mafuaaga taua e mafai ai ona faatusa le tagata amiotonu i le PAMA. (*Ia faatusatusa le ola o le pama ma ona aoga i le tagata amiotonu*)

Fesoasoani mo le Mataupu:

O le tagata amiotonu o le tagata ua sa’o atoatoa lana amio i luma o le Atua. O le tagata ua mauaa lona faatuatua i le Atua Soifua. E matua leai lava sana agasala i luma o le Atua.

O le pama, o le laau e tupu sasao i luga e leai nisi ona lala (branches). E maua’ a ona aa i le palapala. E lē faigofie ona maluelue i matagi. O le laau e teuteu ai malumalu tapuai. O le faailoga o le manumalo. E fesootai lona faamatalaina ma faiga faaleAtua.

O le fesootaiga taua lea o le Pama ma le tagata Amiotonu. O le fesootaiga taua foi lea o le Malaga Faatupu a Iesu ma le Lau Pama e pei na fola ai e tagata le ala. O le faailoga o le Tupu o le Filemu, Tupu o le Manumalo ua Afio mai.

Faamanatu: Ia avea i tatou o ni PAMA mo le Atua

Aso Sa: 12 Aperila 2020 – Aso Sa Toetu

Mataupu: O LE OLA SAUĀINA

O le tasi leni o faafitauli ua faatupulaia i totonu o Samoa i nei aso. O le sini ma le faamoemoe o leni mataupu:

- (1) Ia saili po o le a le mafuaaga o sauaga po o le ola sauaina i lo tatou siosiomaga.
- (2) Ia saili po o le a se fōfō e faaitiitia ma tafieseai ai leni faafitauli.

Faatinoga o le Mataupu:

1. Ia faasoa le Autalavou i uiga eseese o le upu Sauaga poo le Sauaina.
2. Ia fetufaai le Autalavou i ni faiga o loo faaleiloga ai leni mea o le sauaina o tagata i totonu o aiga, o le nuu, aemaise o le Ekalesia.

O loo lagona pea le iuleo – **“Ua tigaina tagata i le tele o mea fai a le EFKS”**

Ia fetufaai le Autalavou, pe fesootai nei upu ma le ola Sauaina o le tagata Lotu.

3. Ia manatunatu i ni auala e mafai ona aveesea ai leni faafitauli mai lo tatou siosiomaga.

Fesoasoani mo le Mataupu:

E uiga lasi le upu sauaina/sauaga ma ona aafiaga i nei aso. O le faamamafa o le tatou mataupu, o le itu faaleagaga. I le talitonuga a lelei le itu faaleagaga, ua lelei foi le itu faaletino. O nisi o taimi e faaleiloga lona faiga, ae ua toatele soifua ua aafia ona o ia faiga lē alofa. O nisi o tagata ua fulitua ma liulotu, ona o le manatu ua sauaina i latou i faiga faa - EFKS.

O le faamoemoe lava o lenei mataupu, ia tatou talanoa ai i lenei taimi ma saili se fofu mo le manuia agai i luma. Auā afai e faauau pea ona fai, o le mea manino, e faatuputeleina lenei faafitauli i le lumanai.

O le Aso Sa lenei o loo faamanatu ai le Toetu Manumalo o Iesu Keriso. O le Atua na iloga ona sauaina e le toatele. E oo lava i ona so'o sa galulue faatasi na latou sauaina le Alii Faaola. Peitai, na manumalo le Faaola ona o le Mafuta pea i lona Atua, e ui o ia o le Atua. O lona itu tagata, ua aoao mai ai i le manumalo o le tagata sauaina pe afai e faamoemoe ma tatalo i le Atua mo se fesoasoani.

Faamanatu: Mafuta i le Atua tatou te manumalo ai.

Aso Sa: 19 Aperila 2020

Mataupu: O LE TUSI A LE PEROFETA O OPETAIA

O le uiga o le igoa Opeteia – *o le auauna a le Atua*. O le tusitusiga aupito i puupuu lea i tusitusiga a Perofeta laiti o le Tusi Paia – Tusi a le Perofeta o Opeteia. E tasi (1) le mataupu ae luasefulu tasi (21) ona fuaiupu. O le galuega faaperofeta a Opeteia o loo faasino tonu lea i tagatānuu o Etoma (Edomites). O Etoma e tupuga mai ia Esau. Ao Esau o le uso o Iakopo – lea e tupuga mai ai tagata Isaraelu ma Iuta. O le toasa o le Atua ia Etoma e pei ona faailoa e le perofeta o Opeteia, e afua mai i lo latou auai faatasi ma nuu ese e pei o Papelonia e faatoilalo ma faatafunaina le aai o Ierusalemia i le tausaga TLM 587. O le faasalaga ua folafola e le Atua mo Etoma, o loo atagia ai faiga Faafegaiga Tuai i le tulafono o le - *Lex Talion Principle* “*Mata i le mata ma le nifo i le nifo*” – o loo faamauiina i le Esoto 21:23-25; Levitiko 24:19-20. O le tulafono na faamauiina e Mose ma Isaraelu e tausi ai le va nonofo lelei o tagata uma. O le tulafono o loo faatauaina ai le tutusa o le faasalaga ma le solitulafono e faia. Afai ua faaleagaina le mata, o lona faasalaga o le mata ia faaleagaina foi. Mo Etoma lava ia, o le faasalaga mai le Atua, o se mea ua tatau, ona o lo latou agaleaga ia Iuta, lo latou uso. (f.15 – “*Auā e latalata le aso o le Alii i nuu uma; e faia ia te oe mea na e faia; e toe iu atu ia te oe mea na e faia.*”).

Ua faamanatu mai mo i tatou, **e leaga le ola taulamalama i le isi uso a tagata**. E moni e eseese i tatou, ae ua tasi i tatou uma ia Iesu Keriso. O lona uiga, ia tatou ola fealofani ma ia fetausiai, ae aua le ola taulamalama e pei ona faia e Etoma ia Isaraelu.

Feau Tupito o le Tusi Atoa: E faamaoni le Atua i lana Feagaiga – Isaraelu.

E tausia e le Atua Isaraelu e oo i le faavavau. Ua leva ona folafola mai e le Atua, o le a Ia faaoo le sala i tagata uma e faaleaga pe faasaua ia Isaraelu – Ken 12: 1-3.

Faamanatu: Aua le amio Faa- Etoma

Aso Sa: 26 Aperila 2020

**Mataupu: AISEA UA LĒ FIAFIA AI SOTOMA IA LOTA? -
Kenese 19:1-11**

O le a tatou toe sailiili i le tala ia Lota pe aisea ua lē fiafia ai tagata o Sotoma. Kenese 19: 5 – “*Ua latou valaau ia Lota, ua faapea atu, O ifea ea tagata, na o mai ia te oe i le po nei? Tuu mai ia i laua ia te i matou nei, ina ia matou iloa i laua*”.

Fesili mo le Talanoaga:

1. Se mea tatau lou fia iloa o ni tagata e fou i lau vaai i totonu o lou nuu?
2. Afai o oe o le tagata Sotoma, o le a sou lagona i lenei mea, aua o lea e foliga na o Lota na talimalo i tagata asiasi atu, ae lē iloa e le nuu?

Fesoasoani mo le Mataupu:

O le upu – iloa e pei ona taua i le tala, o loo faaliliuina i le upu Eperu – *yada*. O le upu – *yada*, e lua ona uiga o loo faaaogaina ai e le Tusi Paia.

(1) *O le iloa fia faamalamalama ma le fia talitonu*. Nisi o tala o loo mai le Tusi Paia: ***Faamasino 18:5, Isaia 41:22, Isaia 41:23, Hosea 6:3, Iona 1:7***

O le uiga taatele lea o le upu – *yada* o loo faaaogaina i tala o le Tusi Paia, e pei ona faamauiina i tala ua taua i luga. O le fiaailoa ma le fiamalamalama ona o se isi faamoemoe lelei e fiafaataunuu.

(2) *O faiga faafeusuaiga (sexual practices)*. O le ituaiga iloa lea o loo faamatala ai le iloa e Atamu o Eva (Ken 4:1, 25) ma le iloa e Kaino o lana ava (Ken 4: 17), ma maua ai fanau.

O le uiga lona lua (2) o loo faaaogaina i le tala ia Lota ma tagata Sotoma. Peitai, e manatu le tatou mataupu, o loo i ai foi le agaga o le iloa –*yada* i lona faaliliuina muamua. Aua e ui lava i uiga o tagata Sotoma e pei ona mafuli i ai mafaufauga i le tala lea, ao le isi lea mea taua e tatau i soo se tagata, o le fiaailoa ma le fiamalamalama o tagata ese e oo atu i totonu o le nuu.

A tuu mai i le soifuaga lenei, e manatu e faapea uma lava tagata o soo se nuu. E taunuu loa pe vaai ni tagata ese i se nuu, e tuu fesilisili po o ai nei tagata. O ni tagata lelei nei tagata pe leai? O fea o mai ai? Ao le a se mafuaaga ua soli ai le nuu? Ma nisi fesili fia malamalama. O fesili o loo faataua ai le saogalemu o le nuu, ina nei auala mai nei tagata ni faiga e leaga ai le nuu.

Faamata, e lē o fesili ia na mafua ai le lē fiafia o Sotoma ia Lota?

E fua lava i le malosia o le talanoaga le tali e iu i ai le Mataupu. Pau le itu taua, o lo tatou faasoa ma talanoa. E ui o tala ua masani ai le faalogo, peitai, o lea lava e fesootai ma le soifuaga lenei. Aua o le mafuaaga tonu lea o le usu a le nuu poo le inu i malo e taunuu i totonu o le nuu. O le usu/inu e malamalama ai le au malaga ma le nuu i fesili o loo tuu fesilisili ai tagata uma. Ae maimau pe ana alu se usu a le nuu o Sotoma i malo ua asiasi atu. E le aveesea e le mataupu le talitonuga o loo i ai nei, ae taua lo tatou talanoa e faatupu lagona mo le agai i luma.

Faamanatu: E taua le fesili fiaailoa ae lē o se isi mafuaaga.

Aso Sa: 3 Me 2020

Mataupu: “AUA NEI OUTOU POPOLE” – Mataio 6:25-34

O le tasi lenei o fetalaiga ua masani ai la tatou faalogo: *Aua nei outou popole*. Ao le fesili: *O tatou malamalama ea i lona uiga loloto pe leai?* O le faamoemoe o lenei mataupu: Ia faamautu atili le talitonuga o i latou ua malamalama i ia fetalaiga a Iesu, ae o se avanoa taua lea e malamalama ai i latou o loo tuufesilisili pea.

Faatinoga o le Mataupu:

Vaevae i vaega e lua. Ia sailiili vaega taitasi i le tala ua filifilia ona tolaulau lea o la latou sailiiliga.

Fesili e ta’iala ai sailiiliga a vaega ta’itasi:

1. O ai e manatu e lelei le popole ao ai foi e manatu e lē o se mea lelei le popole? – Ia faamanino mafuaaga o tali taitasi.
2. I lou tulaga faatautua i totonu o le aiga, nuu ma le aulotu, o se mea tatau lou popole mo ā taeao pe leai? Faamatala mafuaaga o le Ioe po o le Leai.
2. Ua fetalai Iesu, e ‘aia le popole i lo outou ola. O le a se manatu o le tou vaega i lea fetalaiga a Iesu, e talafeagai ma le soifuuga lenei tatou te i ai pe leai?
3. O loo taua nisi o vaaiga o loo iloa ai le tausiga a le Atua i le tagata: f.26 – fafagaina o manu felelei, f.27 – ola tuputupu a’e o le tagata, f.28 – matagofie o le lautalotalo. O mea ia e tutupu ona o galuega a le Atua. E leai se galuega a manu e faia, e faapena foi i le faatupuina o le tagata.
 - a. Se mea tatau lo tatou maloloina lelei, ae galue na o le Atua faapei ona faia i manu ma le lautalotalo?
 - e. Pe lē o ni faiga ia e mafai ai ona faatuputeleina le ola fifilemu o le tagata ae lē galue ma saili lona lava manuia? Afai o le tali e Ioe – Ia aumai ni faamaoniga. Afai o le tali e Leai – ia faamatala ni mafuaaga.

Fesoasoani mo le Mataupu:

Mo soo se tagata tautua lava, e taua tele le ola manatunatu mo le aso a taeao. E taua le popole i lona ola. I le faamoemoe, ia oo mai le aso a taeao, ua i ai se tapenaga mo le sologa lelei pea o le soifuuga.

O le popole o loo talanoa ai Iesu i le vaega lea o ana aoaoga, **o le tapena ma sauni faatasi ma le faatuatua**. O le popole poo le tapenaga o loo i ai faatasi ma le faamoemoe i le Alii e maua ai le tali. O loo taua e Iesu le silisili ese o lana tausiga mo manu felelei ma lautalotalo o le vao. Ae faaii lava mea uma i le faapea mai: E le sili ea lo outou lelei i lo latou? E lē sili ea ona faaofuina o outou o ē faatuatua itiiti?

Ua finagalo Iesu ia aua nei o tatou popole i lona itu lē lelei: o le atuatuvaale ma lē mautonu. Ona o le faailoga lea o le tagata faatuatua itiiti. O le aoa mai o Iesu, ia tatou faatuatua atu ia te Ia. Ua faamanino e Iesu, e sili atu le tausiga mo i tatou o tagata faatuatua i loo le tausiga mo manu ma lautalotalo o le vao.

Faamanatu: Tapena faatasi ma le Atua e manuia ai o tatou faiva

Aso Sa: 10 Me 2020

Mataupu: O TINA O LE TALA LELEI

O le Aso Sa lenei o Tina, e faamanatu ai lo latou sao taua i le atinaeina o aiga, o nuu, aulotu, atunuu ma soo se faalapotopotoga. O le faamoemoe o lenei mataupu, ia tatou faasoa ma talanoa i le sao taua o tina e lē gata i le olaga o aso uma ae faapea foi tina o le Tala Lelei.

Faatinoga o le Mataupu:

1. Ia taitasi ma ta'u mai se mea taua/lelei na faia e lou tina e te manatua ai pea o ia i lou olaga atoa.
2. Saili mai se tina o le Tusi Paia e faatusatusa i ai lou tina.

Faataitaiga:

1. Eseta – O le tina o le masiofo o le aiga, e faatusaina ia Eseta le masiofo, ona o le lototele ma le lalelei.
2. Ruta – o le tina tausi matua. Ua leai se toalua, toe foi Orepa, ae tausi pea ia Naomi.
3. Afafine o Farao – loto alofa. Na ia faasaoina ma tausi le tama na opeopea i le vai, e ui i le tulafono a lona tama.

(Ma nisi lava tina o le Tusi Paia e faatusa i ai le tina i totonu o lou aiga)

Ia manuia le Mataupu:

Faamanatu: Alofa ia Tina

Aso Sa: 24 Me 2020

Mataupu: UA LĒ FIAFIA LE PULE O LE TAUSAMAAGA?

– Ioane 2: 1-11

O le uluai faailoga lea na faia e Iesu i Kana i Kalelaia; o le faaliliuina o le vai e avea ma uaina lelei. Peitai, na le fiafia ai le pule o le tausamaaga. O le a sailiili pe – **Aisea ua lē fiafia ai le pule o le tausamaaga ina ua tofo i le uaina na faaliliuina e Iesu mai kalone vai?**

Faatinoga o le Mataupu:

E fautuaina le vaevae o le Autalavou i vaega e lua. Faitau le tala ua filifilia ma tali i fesili ua saunia.

1. O afea le itu aso o Iesu o lo taua i le f.4?
2. O le a le *tu faamāmā o Iutaia* o loo tā'ua i le fuaiupu e 6?
3. O ai e masani ona auunaina tausamaaga faapea?
4. O ai e tatau ona ave i ai le uaina lelei e tusa o le manatu o le alii Pule?
5. O le a se feau taua o loo mafai ona tatou maua mai i lenei tala ina ua le lava tapenaga a le pule o le tausamaaga?
6. O le a se fesootaiga taua o lenei tala i le amataga o le tusi o Ioane ma le galuega faamisionare a Iesu na afio mai ai i le lalolagi.

Fesoasoani mo le taliina o Fesili:

1. *O afea le itu aso o Iesu? (f.4)*

E i ai taimi o le galuega a Iesu na Ia vavao ai tagata mai le faailoaina o vavega ma faamalologa ua Ia faia. O loo tuufesilisili nisi pe aisea. O le tele o tali, o loo faapea mai, o se faiga lea ua finagalo Iesu, e maua ai le filemu. Ina nei avea le iloa e tagata o vavega ma ala e tupu ai le feitagai ao lea faatoa amata lana galuega folafola. E foliga faapena le uiga o upu a Iesu, ***e le'i oo i lou ituaso***. E le'i amataina le galuega a Iesu. O lea faatoa mavae le filifiliina o ona so'o. E le'i amataina le galuega i ni faamalologa poo nisi vavega faigofie i le faalogo ma le vaai a tagata. Ao lea ua amata i le faaliliuina o le vai e avea ma uaina lelei.

2. *O le a le tu faamamaina o Iutaia?*

O le aganuu faalutaia, e fufulu/mulumulu vae o malo asiati atu, o le faailoga o le aloaia o le taunuu atu i se valaaulia. O le aoga lea o kalone vai e pei ona taua i le tala, o loo i fafo o le fale o loo fai ai le tausamaaga.

3. *O ai e masani ona auauna i tausamaaga faapea? O tagata faigaluega/auauna.*

4. *O ai e tatau ona ave i ai le uaina lelei? Ave i tagata valaaulia/tagata tualoa*

5. *O le a se feau taua mai leni tala ina ua lē lava tapenaga a le Pule? Na o Iesu e atoatoa ai tapenaga uma. Poo le a lava lo tatou naunau ia lelei se mea, e lē atoatoa lava; ua na o Iesu.*

6. *Fesootaiga o le tala ma le Misiona a Iesu? Na afio mai Iesu ina ia faainumia tagata uma i le uaina lelei.*

Faamanatu: O Iesu le uaina lelei

Aso Sa: 31 Me 2020

Mataupu: O LE TUSI A LE PEROFETA O IONA

O le uiga o le igoa Iona – *lupe – dove*. Na galue faaperofeta Iona i le vaitau o avea Ierepoamo II ma tupu ia Isaraelu – TLM 793-753(2 Tupu 14:25). O le tusi na tuufaatasia i le tausaga TLM 760. O vaitau ia o le malosia ma le tamaoaiga o le malo o Asuria.

O le perofeta o loo iloga ona tala i le lē usiisita i le faatonuga a le Atua e alu e talai Iona finagalo i Nineva le aai o Asuria. O le lē usitai o Iona i le Atua, poo le sola i Tasesa, o loo i ai le talitonuga, e mafua i uiga faaletagata o Iona:

1. E tatau le sala mo Nineva. E tatau ona oo le toasa o le Atua ia Nineva e fai ma taua o lo latou faasalaina o tagata o Isaraelu.

2. E fefe Iona, ina nei faasalaina o ia e tagata Nineva faapei ona faia muamua i tagata Isaraelu.

3. Ua manatu Iona i Iona tauleleia i le va ma tagata Isaraelu. Ina ne'i upu leaga o ia, ona o se galuega faaola ua ia faia mo Nineva.

O nisi ia o mafuaaga ua mafai ona taaofa'i ai le tele o mafuaaga na mafua ai le sola o Iona. Peitai, o le finagalo o le Atua, e lē faatagata ona faia.

Feau tupito o le Tusi a le Perofeta o Iona:

O loo faaalua i le tusi leni a Iona, ***le alofa lē faatuaia o le Atua***. O le alofa e lē faatagata ona faia, e pei ona manatu Iona. O le alofa tunoa, e lē faamavaea ini galuega e faia e le tagata. O le

manatu o Iona ma tagata Isaraelu, o le Atua ua na o i latou lava. E lē aofia ai tagata o nuu ese, e pei o Asuria, Papelonía, Aikupito ma isi. Peitai, o le feau tupito lea o le tusi o Iona:

- I. E LĒ FAATUAOIA LE ALOFA O LE ATUA.
- II. O LE ATUA MO LE LALOLAGI UMA
- III. O LE SALAMO FAAMAONI E LIUA AI LE TOASA O LE ATUA

O loo manino i le tala, le Silisili Ese o le Atua i auala na ia saunia e ina ia aoaina le mafaufau o le tagata lē usitai. Na faaaogaina ai e le Atua, le matagi tele, o le auvaa e talitonu i isi atua, o le i'a tele, o le kikaiona ma le anufe. E finagalo le Atua, ina ia tatou faalogo ma usitai atu ia te Ia, ae tu'u o tatou loto.

Faamanatu: E lē faatuāoia le ALOFA o le Atua

Aso Sa: 7 Iuni 2020

Mataupu: E MANATUA FAAPEFEA LOU TAGATA?

O au galuega e mulimuli mai ia te oe. O lona uiga, e manatua oe i au galuega. Pe galuega lelei pe galuega faalēlelei, e manatua lava oe.

Ua filifilia nisi o tagata lauiloa o le Tusi Paia ma galuega na latou faia. O le tatou galuega, o le faitau na sailiili poo a galuega o manatua ai i latou.

Faatinoga o le Mataupu: (Vaevae i vaega e lua – Tama/Teine)

1. O loo taua nisi o tagata mai le Tusi Paia e agai i ai sailiiliga a vaega taitasi, poo a ni galuega lelei pe lē lelei o loo manatua ai i latou.

2. O ai le tagata o le Tusi Paia, e te fia mulimuli i ana galuega na fai?

Lisi o tagata:

- | | |
|-------------------------------|--|
| 1. Hamo le atalii o Noa | 6. Akana ma lona aiga – Iosua 7 |
| 2. Reupena le atalii o Iakopo | 7. Iaeli le ava a Kaveru - Faamasino 4 |
| 3. Tautu uaina a Farao | 8. Tupu o Iosia |
| 4. Faatosaga – Sepela ma Pu'a | |
| 5. Napota | |

Fesoasoani mo le Mataupu:

1. *Hamo le atalii o Noa* – o le faatauemu ia Noa ina ua telenoa le toeaina. E le o se mea e lelei le tagata e faatauemu i matua, tusa lava po o le onā o Noa, e le tatau lava i le fanau ona faatauemu i matua.

2. *Reupena le atalii o Iakopo* – o ia lea na suia le tonu na fai e fasioti Iosefa. O le tonu lea a Reupena na faasaoina le ola o Iosefa ma oo ai ina faatau ese i tagata malaga i le ala.

3. *Tautu uaina a Farao* – ua lagona lona sese, ina ua galo ia te ia le tagata na agalelei ma faamatala lana miti. O lona toe manatua o agalelei o Iosefa, na faasaoina ai le ola o le faamatala miti.

4. *Faatosaga – Sepela ma Pu'a* – o fafine Aikupito ae mata'u i le Atua Soifua

5. Napota – taofiofi mamau i lona faasinomaga –fanua ma le tovine. E tele tupe na folafola e Aapo e faatau ai le fanua ma le tovine ae le’i mafai, ona o le alofa i lona faasinomaga.

6. *Akana ma lona Aiga* – na susunuina i le vanu ona ua toesea ma tanu auro ma mea matagofie ua faatoina mo le Atua.

7. *Iaeli le ava a Kaveru* – fasioti le tupu leaga o Sesera

8. *Tupu o Iosia* – toe faafou tulafono o le nuu o le Atua ona o le tusi taai na maua i le malumalu.

O le faamoemoe, ia aoao mai galuega o manatua ai nei tagata mo i tatou. E taua foi lo tatou iloa o galuega lē lelei na faia e nisi tagata e aoaoina ai i tatou mo le agai i luma; ia aua nei faataitai i ai se isi.

O nisi o tupulaga ua o ese mai taiala ma galuega lelei na faia e matua i aso ua mavae. O le fesili: Aisea, ua faapea ai i tatou le fanau? Aisea ua tatou le faaauauina ai galuega ma le tautua a matua sa faia i aso o le mativa.

Faamanatu: Ia manatua lou Talavou i ni galuega lelei!

Aso Sa: 14 Iuni 2020

Mataupu: IA TOE TIMATA LE UPEGA – Salamo 131

E lua ni vaega taua o loo faaautu i ai lenei mataupu:

1. Ia malamalama le Autalavou i le uiga moni o lenei alagaupu a le atunuu – *Ia toe timata le upega.*

2. Ia aoaoina i tatou i le uiga o le Salamo 131.

Nisi o fesili e tatala ai le Mataupu o lenei aso:

1 - O a nisi faatinoga o loo iloa ai le faamaualuga o Saulo i lona nuu faatasi ai ma le Atua e ese mai le faatonuga o loo taua i le 1Samuelu 22?

2 – O a ni faatinoga poo ni faatonuga faa-Saulo o loo vaaia i lo tatou siosiomaga o aso nei?

3 – O le a se fesootaiga o le Salamo 131 ma le Vaega o Salamo o vaevaeina i ai – SALAMO Ā Ē O A’E?

4 – O le a le uiga o le ata faatusa o loo talanoa ai Tavita i le fuaiupu e 2: “E moni, na ou fifilemu ma ou faalologo, *faapei o le tama ua te’a ma le susu o lona tina, ua tusa a’u ma le tama ua te’a ma le susu*”

Fesoasoani mo le Mataupu:

(O le a taoto pea i le Autalavou e fetufaai i le mafuaaga ma le uiga tonu o le alagaupu ua fai ma autu)

O le Salamo 131 o loo faaulutalaina – Loto Maulalo: O le Salamo na lagiina e Tavita ina ua aloaia lona tulai mai e fai ma tupu ia Isaraelu. O le tautinoga a Tavita i le Atua, ina ua ia mautinoa, o le mafuaaga tonu lea o le toilalo o le faigamalo a Saulo – **Ua leai se loto maulalo.** E faamaualuga lona loto. E lē gata i ona tagata, ae faapea foi lona loto faamaualuga i le Atua Soifua.

Fai mai le tautinoga a Tavita: *“Le Alii e, ua ou lē loto faamaualuga, ua lē faasiasia ou mata, ou te lē masani ma mea faasilisili ma mea ua sili ona faigata ia te au. E moni, na ou fifilemu ma ou faalologo, faapei o le tama ua te’a ma le susu o lona tina, ua tusa a’u ma le tama ua te’a ma le susu.”*

O le naunautaiga o Tavita – IA TOE TIMATA LE UPEGA.

- i. Afai sa faasiasia ma sauva mata o Saulo i tagata, e tatau la ia te ia ona alofa i soo se tagata.
- ii. Afai ua masani Saulo i le saili viiga i faiga piopio ma le amioletonu, e tatau la ia te ia ona faia mea uma ma le amiotonu.
- iii. Afai o Saulo sa faia ana faatinoga i lona malosi ma lona atamai, e tatau la ia te ia ona fifilemu ma faalologo i le taitaiga a le Agaga a le Atua e manuia ai ona faiva.

Salamo 131:2 – o le tama ua te’a ma le susu o lona tina.

I le soifuaga lenei, o le te’a ma le susu o le tina, o le isi lea faailoga e iloa ai le tamaitiiti ua faasolo ina matua. Peitai o uiga masani o le olaga, e ui lava ina te’a ma le susu le tamaitiiti, e lē mafai lava ona ola na o ia. E moni ua ia iloa le matagofie o lona siosiomaga, e momoo ma manaonao solo i lea mea ma lea mea, peitai, e lē mafai ona ia maua, seia vagana ua ave i ai e le tama poo le tina. E foliga faapea le uiga o upu ia a Tavita – ua tusa o ia ma le tamaitiiti ua te’a ma le susu o lona tina.

E peiseai o lea ua tautino Tavita ma faapea mai: *“Le Alii e, e ui ua ou matua, ua ou iloa le matagofie o lo’u siosiomaga ma mea uma. Ou te momoo foi ma manaonao solo i vaaiga matagofie o le ola lenei, peitai, e lē mafai ona ou faia o se mea pe afai e te lē finagalo i ai.”* O lagona o le faatauvaavaa ma le moomia pea o le taitaiga a le Atua, e ui o ia o le tupu, o ia o le taitai o tagata e toatele. O le tagata malosi foi. Peitai, e le mafaia ona faia o se mea, e aunoa ma le faasinomaga a le Atua.

Salamo a ē ō a’e (Psalms of Ascent):

O le Salamo 131 e aofia i Salamo ua faaigoaina – Salamo a ē ō a’e. O pese ma Salamo e lagiina e Iutaia pe a ē ō a’e i le malumalu i Ieruselema e faataunuu tausamiga ma tapuaiga faamanatu e pei o: Tausamiga o le Paseka, o le Penetekoso, o Fale Apitaga ma isi lava sauniga e faamanatu ai le alofa taitai o le Atua ia Isaraelu. Pe afai e o a’e i le malumalu e tapuai i le Atua, o le agaga foi lea e tasi e tatau ona maua e tagata tapuai uma. Ia aua nei mata faasiasia se tasi i luma o le Atua. Ia ofo le tapuaiga ma le loto atoa. Ua fetalai Iesu, Ia faalelei ma le uso, ao le’i faia le taulaga. O le tapuaiga foi e tatau ona faia ma le loto maulalo. Ia iloa ona ava ma mata’u i le Atua Soifua. O mea uma foi e faia, ia faia i le taitaiga a le Agaga o le Atua.

Faamanatu: O le loto maulalo e maua ai manuia

Aso Sa: 21 Iuni 2019

Mataupu: “A OU TE FAI ATU A’U IA TE OUTOU” - Mataio 5:21-48

O le tusi faitau, o loo vaevaeina i vaega/pakalafa e ono. O loo amata a ii le toe faamanatu ifo e Iesu o tulafono o le Feagaiga Tuai, ae mulimuli ane ua fetalai faapea: “*A ou te fai atu a’u ia te outou...*”. E manatu le tatou mataupu, e taua lo tatou toe faitau i nei aoaoga a Iesu ma saili pe aisea ua faapea ai ona fetalai le Alii.

Faatinoga o le Mataupu:

1. Vaevae le Autalavou i vaega e 6 e tusa o fetailaiga ia a Iesu, ma sailiili vaega taitasi, po o le a le uiga o aoaoga ia a Iesu.

- | | |
|-----------------------|--------------------|
| a. Vaega 1 – f. 21-26 | o. Vaega 4 – 33-37 |
| e. Vaega 2 – 27-30 | u. Vaega 5 – 38-42 |
| i. Vaega 3 – 31-32 | f. Vaega 6 – 43-48 |

2. Ia faailoa e vaega taitasi ni aoaoga ua maua mai le latou sailiiliga sa faia.

Fesoasoani mo le Mataupu.

1. f.21-26: *Aua e te fasioti tagata* - o loo lilifa le faasalaga i le tagata na te faaoo le oti i le isi tagata. Peitai, o le finagalo o Iesu, e tatau ona amata le faasalaga i le faapogai o le ita ua afua ai le oti. E tatau foi ona aafia le tagata ua oti. I le talitonuga, o le oti o le taunuuga lea o se finauga poo se feeseeseaiga ua lē mafai ona foia. O le ala lea o le fetalai manino o Iesu, e tatau ona nofo sala foi le tagata na te faatupu le ita i le loto o le isi tagata. O le faamoemoe o le Alii, ia nofo fealofani tagata uma. Ia taumamao ma le loto ita, aua o le faapogai lea o misa ma fevaevaeaiga e taunuu ai i le oti.

2. f.27-30: *Aua e te mulilua.* E foliga tutusa lava le faamoemoe o Iesu i tulafono lea o le mulilua ma le tulafono o le fasioti tagata. O le ua ave le mamafa o le faasalaga i le tagata na te faataunuu le oti ma faatino le mulilua. Ae ua saoloto ai le tagata o loo mulilua lona loto i le manao tele. O se saunoaga o loo aafia ai ma le au tusiupu ma au farasaio. Ina ua silafia lelei e Iesu, o tagata faafiaamitonu nei tagata. Na ona latou faamamalu le tulafono ma faaleo faasalaga mo e ua faatino le mulilua, ao i latou isi tagata o loo manaonao o latou loto. O la Iesu, o le mulilua foi le mea lena.

3. f.31-32: *Ai se faatea i lana ava, ia avatu ia te ia le tusi alei – Teu 24:1*

E aloaia le tetea ma le toalua pe a fai se tusi alei. Peitai, o lea ua ta’u mulilua e Iesu le tagata e manatu e tetea ma le toalua. O ai foi e nonofo ma lē ua faateaina, o le mulilua lava lea. Ua fetalai tonu a Iesu i le mea moni o loo tupu i le siosiomaga o tagata Iutaia. Ua silafia lelei e Iesu, ua fai le tusi alei ma auala e aloaia ai le tetea ma le toalua ina ia faataunuu le isi manao lea e mulimuli mai, o le toe nonofo ma le isi tagata. O le uiga lea o le finagalo o Iesu, e tatau ona ta’usalaina foi lea tagata. Aua o le tetea ma le ava e lē o se mea e tatau ona tupu. E tatau ona fai se tulafono e faamalosia ai le nonofo fealofani o ulugalii ae aua le faia

le tulafono e faafaigofie ai le tetea o ulugalii ina ia faataunuu le isi manao lē lelei lea e mulimuli mai, o le toe faitoalua i le isi tagata.

4.f.33-37: *Aua le tauto pepelo, a ia e avatu i le Alii o mea e te tauto ai (Eso 20:7/Levi 19:12)* - Ua finagalo Iesu, ia tau o le Ioe poo le Leai. Ae aua le tauto pepelo. Ua silafia e Iesu, o le tasi lea

faiga ua saili ai viiga o tagata, o le tauto ma folafola i luma o tagata, ae ese lava le olaga o loo ola ai.

5. f.38-42: *E suia le mata i le mata, e suia foi le nifo i le nifo – Eso 21:24/Levi24:19* – O le tulafono na faia e Mose ma le nuu ina ia nofo filemu tagata uma. O le faamoemoe, ia tutusa le solitulafono ma lona faasalaga. O se faiga ina ia maua se nofo filemu o tagata pe a oo ina tutupu ni feeseeseaiga i totonu o aiga ma nuu. Peitai, e oo mai i taimi o Iesu, ua avea lea tulafono e fai ma ala e faataunuu ai le loto ita ona o se feeseeseaiga.

I le finagalo la o Iesu, e moni e maua le filemu i le faiga lea – mata i le mata, peitai, e le tumau lona filemu, e toe pisa foi. Ao le loto faamagalo, o le filemu sili lea. A agaleaga mai, alofa pea i ai. Poo a lava mea leaga a lou uso, ia alofa ma faamagalo. E sili atu le filemu pe a loto fefaamagaloi tagata uma, i loo le tau i le mata i le mata. O le liliu i ai o le alafau, o le savali ese mai le faafitauli. Tatala i ai ma le ofu tele, o le faailoga o le mamalu ma le alaoia, ave uma i ai pe a manao i le ofu tino, o le mea e sili ona latalata ia te oe. Afai e savali i maila e tasi, faaauau atu le savaliga i maila e lua. Aua le fiu e fai le lelei, aua e avea le agalelei atu ma ala e suia ai le loto ita.

6. f.43-48: *Ia e alofa atu i le lua te tuaoi – Levi 19:18* – Ua aoao Iesu, ina ia ola tagata uma i le alofa faale-Atua. O le alofa e onosai, e faamaoni, e le faatuaioia, e faamagalo. O le alofa i le tagata ua ita mai, e lē o se mea e faigofie. Peitai, o le atoatoa lea o le ola i le alofa. Aua e leai se aoga e alofa ai i le Atua e lē vaaia ae ita i le uso o loo nonofo i aso uma. O la Iesu, ia atoatoa la outou amio e pei o le Tama e atoatoa ona lelei o lana amio.

Ua manatu Farasaio ma le au Tusi Upu, ua suia e Iesu tulafono mai anamua, ina ua faapea mai Iesu: **A ou te fai atu a’u**..... Peitai, o loo manino lava i le fetalaiga a Iesu i le fuaiupu e 17: *“Aua nei outou manatu ua ou sau e tatalaina le tulafono po o le au perofeta; ou te lei sau e tatalaina, a ia faataunuuina”*. Na Afio mai Iesu i le lalolagi, e faataunuu le tulafono i le amiotonu e tatau ona tausisia e tagata Kerisiano.

Faamanatu: Aua le popole, o loo soifua le Atua.

Aso Sa: 28 Iuni 2020

Mataupu: O LE TUSI A LE PEROFETA O MIKA

O le tusi lona ono lea o tusitusiga a Perofeta Laiti. O le uiga o le igoa Mika – who is like the Eternal? – O ai e tutusa ma le Atua? Mika 7:18.

Na galue faaperofeta Mika i le vaitau o fai ma tupu o Iuta – Iotama: TLM 750-731, Aasa – TLM 735-715, Esekia – TLM 715-686 (Mika 1:1). E foliga tutusa ma e fesootai lelei galuega faaperofeta a Mika, Isaia ma Hosea.

O le feau faaperofeta a Mika o loo faasino ia Isaraelu ma Iuta aemaise o ona aai tutotonu o Samaria ma Ierusalema. O le galuega faaperofeta e mafua ona o le agasala ua sasao faaafi. E aofia ai:

1. ifo i atua mamate – idolatry,

2. o faiga pisinisi faapaupau – evil business practices – e faaoga ai le pule ma le malosi e maua ai le oloa faasili mai atinae a tagata matitiva ma pologa.

3. ola lē faamaoni - e lē gata o le va ma tagata i aso uma ae faapea le va ma le Atua Soifua

4. o le ola taufaavalea ma faiga taufaasese i tagata lē taualoa – cheating and bribery, ma isi lava faiga amioletonu ua oia ai le nofo lelei o tagata uma – internal strife and corruption.

O ia faiga amioletonu i luma o le Atua, o loo tuua'ia ai lava taitai o le nuu. I le silafaga a le Atua, ua leai se vaipanoa o le ola o Isaraelu o toe lelei. Ua faaletonu le ola tapuai, o aga fesootai o aso uma, ma le itu i le tamaoaga ua faaleagaina.

O le mafuaaga lea ua vavalo ai e le Perofeta le oo mai o faasalaga e pei: o le oge, o taua ma misa i le lotoifale, aemaise o le faatafea i nuu ese. (Mika 1-3).

O le auivi o le Tusi o Mika:

Mika 1: O loo faailo ai le faamasinoga a le Atua mo Isaraelu

Mika 2-3: Ua lē fiafia le Atua i faiga amio piopio a tagata mauoa ma tagata atamamai o loo taotaomia ai tagata vaivai. Aemaise o perofeta pepelo ma a latou folafolaga.

Mika 4-5: Valoaga o le afio mai o Iesu ma le faasalaga o e ua fai Isaraelu ma o latou fili

Mika 6: O le lē fiafia o le Atua ia Isaraelu ma lona faasalaga

Mika 7: Ua faamagaloina e le Atua agasala a Isaraelu ma lona manuia e mulimuli mai.

E tolu vaega tetele o loo faaautu i ai le tusi o Mika: (1) – o le agasala a le nuu - sin,(2)- o le faasalaga - destruction, (3) - o le toe faafoisia o manuia pe a salamō ma foi i le Atua - restoration.

Mika 5:2: o loo manino ai le Afio mai o le Mesia ma le nuu ua valoia.

Faamanatu: E faasala e le Atua le tagata agasala ona o lona Alofa

Aso Sa: 5 Iulai 2020

Mataupu: FAATALITALI I LE TAIMI O LE ALII

O le faamoemoe lea o soo se kerisiano, ia oo mai le taimi o le Alii. Peitai, o loo tuufesilisili pea le mafaufau poo afea taimi o le Alii.

Fesili mo le talanoaga:

1. O ā tonu taimi o le Alii - taimi o manuia poo taimi o faigata?

2. E faapefea ona tatou faatalitali i le Taimi o le Alii - Faatalitali nofonofo pe faatalitali galulue?

Faatinoga o le Mataupu:

1. E fautuaina le talanoa faatasi e tali fesili ua tuuina atu i lalo.

2. Vaevae i vaega e lua: Vaega 1 – Saili ni tala se lua mai le Tusi Paia o loo faamatala ai le manuia o le tagata e faatalitali i le taimi o le Alii.

Vaega 2 – Saili ni tala se lua mai le Tusi Paia o loo faamatala ai le malaia o le tagata e lē faatali i le taimi o le Alii.

Fesoasoani mo le Mataupu:

O le taimi o le Atua, o taimi ia e faaalua ai Lana Amiotonu mo ona tagata. O ē ua faatuatua i le Atua ma tausi i ana poloaiga, e maua e i latou le manuia. Ao ē ua faia amioga e inosia i luma o le Atua, o i latou ia e feagai ma puapuaga.

O i latou na faatali i le taimi o le Alii:

1. Tavita – e tiga lava ona augani lana ‘au tau e fasioti ia Saulo, ae na faatali lava Tavita i le faamasinoga a le Atua. O le tau, na avea ma tupu ia Isaraelu.
2. Iopu – tiga lava ona tele fautuaga a lona toalua ma ana uo e faifai i le Atua ona o puapuaga, ae na onosai lava Iopu. O le tali, na faaluaina mea uma sa ia te ia ona o le faatali i le taimi o le Alii
3. Aperaamo – e tele tofotofoga na tuuina e le Atua ia Aperaamo, ae na usitai ma faia mea e pei ona fetalai le Atua. O le tau, o faamanuiaga e tele, ona o le faatali pea i le taimi o le Alii.

O i latou e le'i faatali i le taimi o le Alii:

1. Saulo: o le vaivaiga tele lea o Saulo na iloa i lana nofoaiga, e fiu e faatali i le taimi o le Alii. O ana faaiuga ma faamasinoga, ua atagia ai lona faalogo i tagata ae le faatali i le Alii mo se faatonuga. O se iuga, o le aveesea mai le nofoalii.
2. Sara ma Aperaamo – o le le faatali o Sara i le taimi o le Atua, na ia fautuaina ai Aperaamo e momoe ma Akara ina ia maua ai sana tama; lea na fanau ai Isamaeli. Mulimuli ane ua faaalua le taimi o le taimi o le Alii e ala ia Isaako. O le mafuaaga lea o le tupuga mai o tagata faatupuvevesi ia Isamaeli, ona o le lē faatali o Sara ma Aperaamo i taimi o le Alii.
3. Iona le Perofeta – na faia mea uma i lona loto. E musu e faalogo ma talia taimi o le Atua mo Nineva. O le iuga, o le feagai ma faigata. Na faasaoina e le Atua ona o lona Alofa, ae le'i atoatoa ai le loto atu o Iona e faatali i taimi o le Alii.

(ma nisi tala e maua i sailiiliga a le Autalavou)

Aoaoga mo le Autalavou:

E leai se taimi faapitoa o le Atua. O le oo mai o faamanuiaga ma faigata i le soifua galue o le tagata faatuatua, o taimi uma ia o le Atua. O le taimi o faigata ma tiga, o ituaso ia o loo tofotofoina ai le ola faatuatua o le tagata. O lona uiga, e taua le ola tapenapena. Ola sauniuni i taimi uma. E lelei lava le oo mai o le taimi o le Atua, o loo lava sa tatou tapenaga. E tapena faapefea i tatou le tupulaga talavou? Tapena faaleagaga. Ia malosi le ola faaleagaga. Aua a malosi le ola faaleagaga, ua malosi foi le ola faaletino ma le ola faalemafaufau. Ia toaga e tatalo ma fiafia e alu i le lotu.

Faamanatu: Tatou faatalitali galulue mo taimi o le Atua

Aso Sa: 12 Iulai 2020

Mataupu: TINĀ I LE GAFA O IESU – Mataio 1:1-17

O le mataupu o lenei Aso Sa, o se toe iloiloga o tala faamauiina o tinā o loo ta'ua o i le gafa o Iesu. Ia le gata e maua ai se isi malamalamaaga i lo latou sao taua e fesootai ia Iesu, ae ia tatou maua ai foi ni aoaoga taua ona o lo latou soifua faaogaina.

Faatinoga o le Mataupu:

1. E fautuaina le vaevae o le Autalavou i vaega e lima (5). Tofu le vaega ma le tina o taua i le gafa o Iesu, e faitau ma sailiili i ona tala faamauina i le Tusi Paia.

1. Tamara (Kenese 38:1-25)

2. Raava (Iosua 2, 6: 22-25)

3. Ruta (O le tusi ia Ruta)

4. Patesepa (avā a Uria) – (2 Samuelu 1:1-27)

5. Maria le taupou (Luka 1:35)

Fesoasoani mo le Mataupu:

1. Kenese 38:1-25 – O Tamara o le fafine Kanana sa fai ma avā a Eru le atalii o Iuta. Na oti Eru ona o se tagata amio leaga i luma o le Atua. Na toe nonofo Tamara ma Onani le uso o Eru peitai, na oti foi Onani ona o lana amio leaga i luma o le Atua ae leai lava se fanau a Tamara ua maua. Ua toe o Sila le atalii o Iuta peitai e laititi. O le tuutuuga na faia, e faatali Tamara seia matua Sila ona la toe nonofo lea. Peitai, na fai e Tamara le togafiti ia Iuta, ina ua asiasi ane i lona nuu, ma iu ina fanau ai lana fanau o Faresa ma Sera. O tama ia na faaauuina le gafa o le aiga sa Iuta i le tala faasolopito o Isaraelu.

O le mafuaaga lea o le taua o le igoa o Tamara, ona o le tina na tutupu ai le gafa o sa Iuta e oo mai i taimi o Iesu. O le togafiti poto na faia ma le faamoemoe, ia tupu pea le gafa o sa Iutā.

2. Iosua 2:1-24, 6:22-25 – O Raava o le fafine talitane e pei ona faamauina. Peitai, o ana faatinoga e pei ona faamatalaina e le tusi o Iosua, e feteenai ma ona uiga faatalitane. O Raava na ia faasaoina le au asiasi a Iosua. O le taua o lona mata’u i le Atua, na faaolaina ai o ia ma lona aiga atoa. *Iosua 6: 25* –

3. O le tusi ia Ruta: tele itu taua o le soifuaga o Ruta e pei ona faamauina e le Tusi Paia. O se tina alofa faamaoni ma tausii matua. E ui ua maliu lana tane, ae na ia tausii lava le tina o lana tane. Na oo lava ina ua toe foi Naomi i Peteleema, na faia pea le tautua a Ruta e ala i le saili o meaai e tausii ai Naomi. O se aoaoga tele lea, mo i tatou le tupulaga talavou i le taua o le tausii matua. Ia tausii faamaoni o tatou matua matutua, aua e le pine lo latou faamanuia mo i tatou.

4.2 Samuelu 11: 1-27 - Patesepa (avā a Uria) – Na o Tavita o loo taua lona faamaualalo ma saili i le Atua mo se faamagaloga ina ua iloa lana mea sese sa faia. Peitai, e i ai le talitonuga, o loo i ai faatasi ma Patesepa i le sailiga lea a Tavita i le Atua. Na oti le atalii muamua, ona o le faataunuuina o le faamasinoga a le Atua. Peitai, na mulimuli ane ua fanau Solomona, na te faaauu le gafa o Tavita. O le taua lea o le loto salamo faatasi o Tavita ma Patesepa.

5. Luka 1:35 – Maria le taupou – E lei maasiasi Maria e tauave le maitaga na poloaina ai o ia e le Agelu. E ui lava e faasinoinomia e tagata, ae faalogo ma usitai i le fetalai mai o le Atua. E ui o Iesu o le Atua, ae i ai le talitonuga, e tele a se sao o Maria ma Iosefa i le tapu’eina o le soifua o Iesu i le tino, mafaufau ma le agaga.

Faamanatu: Ia faafetaia le Atua ona o tina ua tatou maua

Aso Sa: 19 Iulai 2020

Mataupu: O MANU FEAI NA ILOA E TANIELU – Tanielu 7:1-8

E tele faaaliga na iloa e Tanielu e pei ona faamauina i le Tusi Paia, ae ua filifilia le faaaliga e manu fea'i tatou te faasoa ai i lenei Aso Sa.

O le Tusi o Tanielu na tusia e Tanielu. O le mataupu 1-6 o loo faamatalatala ai e Tanielu vaaiga na tutupu ia te ia ma ana uo e toatolu i le ulua'i taimi na ulufale ai i Papelonia. O le mataupu e 7-12 o loo faaigoina o Tusitusiga Faa- Apokalifa – '*Apocalyptic Literature*'. O tusitusiga faa- Apokalifa o loo faaaoga ai le gagana faa-faatusa (*symbolic language*) e faamatala ai ni mea moni o le a tutupu i le lumanai (*future*).

O miti/faaaliga e pei ona taua i le tala sa faitauina o loo aumaia i le gagana Faa-Apokalifa. Ua faaaoga ai manu eseese – leona (lion), urosa (bear), nameri (leopard), manu mata'utia (fourth beast) ma o latou uiga e faamatala ai le malosi o malo eseese o le a pulea le lalolagi aemaise lava o Isaraelu.

a. Manu muamua – Tanielu 7: 4(faitau e le Autalavou)

O le manu muamua ua faatusaina i ai le malosi o le malo o PAPELONIA (BABYLON). Ua aumai ai le ata o le leona o le tupu o manu o le vao, ma le aeto o le tupu o manu felelei e faamatala ai le malosi uiga ese o ana pulega. Peitai, o le manu e pei ona taua, e faatuina i vae e pei o se tagata. O le faatusa o Papelonia e pulea e le tagata e peiseai lona malosi o le malosi o le leona ma le malosi o le aeto.

Ua i ai foi i lona loto le faamaualuga ma le faasausili, e leai lava se tagata e tutusa ma ia. Peitai, o le tala a Tanielu, na ia vaavaai foi i le taimi na *futifutiesea ai ona apaau*. O lona uiga, e sau le aso ma le taimi e muta ai le malosi o Papelonia ma i'u ina pulea e isi malo.

e. Manu lona lua – Tanielu 7: 5 (faitau e le Autalavou)

O le manu lona lua ua faatusa i ai le malo o METAI MA PERESIA (MEDES AND PERSIA). O ivi asoaso e tolu ua ū i nifo o loo faasino i malo e tolu o le a faatoilaloina e Metai ma Peresia e aofia ai: Papelonia (Babylon), Aikupito (Egypt), Litia (Lydia in Turkey). O loo taua i le vaaiga na iloa e Tanielu – o le urosa *ua tulai atu i le tasi itu*. O le faailoga lea e iloa ai e malosi atu Peresia i loo Metai, e ui o loo galulue faatasi. I le tala faasolopito, na faatoilaloina e Peresia le malo o Litia (Lydia) i le tausaga e 546 (TLM), o Papelonia – 539 (TLM), Aikupito – 525 (TLM). O loo taua foi e Tanielu, le faatonuga ua faapea atu ia Metai ma Peresia – *Tulai ia, ina e 'ai tino e tele*. O le faatonuga e aumai mai le Atua. O le faatonuga ua faaaoga ai e le Atua le malo o Metai ma Peresia e faatoilalo malo nei e tolu ona o le saua ma le pule lē alofā ia Isaraelu le nuu filifilia o le Atua.

i. Manu lona tolu – Tanielu 7: 6 (faitau e le Autalavou)

O le manu lona tolu, ua faatusa i ai le saosaoa ma le maoae o le tulai mai o le malo o ELENI (GREECE) e faatoilalo Metai ma Peresia. O loo faamauina i tala faasolopito e na o le tolu tausaga na faatoilaloina ai e Eleni le malo tele o Metai ma Peresia. O le matāti'a ua faamauina ai le malosi tele o le tulai mai o lenei ta'ita'i iloga o Alesana le Sili (Alexander the Great). O ulu e fa o le manu feai, ua faailoa ai le vaevaeina o le malo o Eleni i malo e fa (4) pe a mavae atu Alesana le Sili. O le pule foi sa tuuina ia Eleni e faia ai o ia mea uma, e mai le Atua lea.

o. Manu lona fa – Tanielu 7: 7-8 9 (faitau e le Autalavou)

O le manu lona fa ua faatusa i ai le malo o ROMA (ROME) i lona malosi tele na faatoilaloina ai le malo o Eleni. O *nifo e sefulu i le ulu* o le manu fea'i, o loo faasino i nisi faigamalo e sefulu e mafai ona tupuga mai le malo o Roma pe afai e faatoilaloina. O le *nifo itiiti ua tupu ae i le va o ia nifo ua i ai mata e pei o mata o le tagata atoa ma le gutu e tautalatala i upu faasausili-* o loo faasino i le malo o i latou e tete'e ma fāifāi i le Malo o le Atua (Anti -Christ). O le iuga o lea malo, o le lafo i le afi mumū.

Aoaoga mo le Autalavou:

Tatou te lē o mafuta ma ni manu fe'a'i, tatou te lē o ola foi i totonu o malo e pei ona ta'ua i le tala. Ae o loo i ai faatonuga ma faatinoga faamanu fea'i o loo siosiomia ai lo tatou ola o aso uma. O le lu'i o le mataupu, ia silasila ane i lou lotoifale, totonu o le aiga, totonu o le nuu, le ekaleisa, totonu o faalapopotoga o loo e galue ai po o i ai ni faiga faamanu fea'i o i ai.

Mareko 1: 9-13 - o loo faamauina ai le manumalo aoao o Iesu i faaososoga ma manu feai sa i ai le vao. Ao le manumalo e maua ona o le mana o le Agaga Paia. O le faamalosi lea, tatou te manumalo i faiga faamanu fe'a'i pe afai tatou te faamoemoe i le Agaga Paia o le Atua.

Faamanatu: O le Agaga Paia tatou te manumalo ai!

Aso Sa: 26 Iulai 2020

Mataupu: O LE TUSI A LE PEROFETA O NAUMA

O le tusi a le Perofeta o Iona, o loo taua ai le salamō o le Atua i lona toasa ona o le salamō o Nineva mai le agasala sa latou faia. Peitai, o le tusi o Nauma o loo valoia ai le faatafunaina o Nineva le aai tele o Asuria ona ua toe fai foi le agasala i luma o le Atua.

O loo i ai le talitonuga sa tusia le tusi lenei a Nauma i le TLM 615. Na taunuu le faatoilaloina o Asuria e Papelonia i le tausaga TLM 612.

O loo faamauina le sau tele o Asuria i lona malosi faafitafita (3:1). I le tele o suesuega o loo i ai faiga sau e aveesea (tipi/cut off) o lima ma vae o fitafita o Iuta pe afai e faasalaina. Faatasi ma nisi faiga mataga ua inosia i luma o le Atua.

I le Aotelega o le tusi ua mafai ona faapuupuu i le faitauga e faapea:

Nauma 1:1-15: O le feau ua faasino tonu mo Nineva. Ua faailoa e Nauma le toasa o le Atua ona o le nuu faapaupau. Peitai e tumau pea le alofa o le Atua mo i latou o ē faatuatua ia te ia (1:7). O le a faaumatia o faatusa ma faiga paupau o loo tapuai i ai Asuria. Ae o le a faatumauiina le Malo o Iuta ma ana tapuaiga i le Atua Soifua e toatasi.

Nauma 2 – 3: O le nuu sau ma le faapaupau o le a feagai ma mafatiaga e faapei ona latou faia i isi tagata. O ona aai o le a faatafunaina. O le mafatia o tagata ona o faiga faaAsuria – (tatipi lima o pagota) o le a toe lagona lava e tagata Asuria ona o le toasa o le Atua. O loo manino foi i upu a Nauma, o le mafatia o Asuria, o se faailoga lea o le toasa o le Atua pe afai e le faamaoni le tagata i le Atua. Na tuu avanoa i ai le Atua i le taimi muamua, peitai, ua le tumau ai.

Faamanatu: E matautia le toasa o le Atua!

Aso Sa: 2 Aokuso 2020

Mataupu: TUSI A LE APOSETOLO O PAULO IA ROMA

E fautuaina le fai o ni kopi o le mataupu ua saunia e silasila i ai le Autalavou.

Fesoasoani mo le Mataupu:

Ua vaevaeina le sailiiliga o lenei Aso Sa i vaega e fa (4):

1. Talaaga o le Ekalesia i Roma:

E i ai le talitonuga taatele e faapea; e le'i faatuina e Paulo le Ekalesia i Roma. A'o le Ekalesia na mafai ona faavaeina e Iutaia Kerisiano o loo nonofo i Roma. O i latou ia o loo i ai le talitonuga, na liua e avea ma kerisiano ona o le malaga a'e i Ierusalem ma sauniga faapitoa a tagata Iutaia i tausaga taitasi. O nisi o i latou sa auai i le faatasiga i Ierusalem i le Aso o le Penetekoso (Galuega 2:10).

2. Taimi ma le nofoaga na tusia ai le tusi:

Ua talia lautele lava, o le tusi i le Ekalesia i Roma, na tusia e le Aposetolo o Paulo, i le tausaga T.A. 56-57 i le vaitau o le tau malulu (winter) agai i le amataga o le tau totogo (spring). Na tusia le tusi ao i ai Paulo i Korinito, ina ua malolo ane mai lana galuega tala'i i Efeso (T.A. 52-55) – Galuega 19.

3. O tolu ni vaega taua o loo faailoa e Paulo i le tusi lenei:

1. O le tusi a Paulo, o se faailoa lea mo le au faatuatua i lona oo atu i le latou galuega i Roma. O loo i ai le faamoemoe o le Aposetolo e asia le au faatuatua i Roma pe afai e ui atu i Sepania e faaauau ai lana galuega tala'i (Roma 15:24).

2. Faailoa le malaga i Ierusalem e momoli le foai tupe ua saunia e aulotu o loo i Maketonia ma Akaia (15:25-28).

3. Ia avea le asiasi atu o le Aposetolo i le Ekalesia e talanoa ai i nisi o mataupu mo le faatuputeleina o le Tala Lelei. O se avanoa lelei foi lea e tali ai nisi o fesili o loo feteenai ai le talitonuga o Iutaia Kerisiano ma tagata o nuu ese (Gentiles).

4. Feau Faaleagaga o le Tusi – Central Theme – Roma 1:16-17

Tauamiotonuina i le faatuatua – Justification by faith alone. Ua faamanino e Paulo, e le maua lou faaolataga i lou tupuaga – Iutaia poo Roma, poo galuega e te faia. Ae maua lou faaolaina ina ua e talia le faaolataga na saunia e Iesu Keriso i lona lava alofa tunoa. Ua faailoa foi e Paulo, o tagata uma e agasala – Roma 3:23. Ae maua lo tatou faamagaloina, ina ua tatou talia le faaolataga e ala i le alofa tunoa o le Atua.

Faamanatu: E maua le Faaolataga i lou faatuatua

Aso Sa: 9 Aokuso 2020

Mataupu: O LE FALE MA LE ANOFALE

O upu masani lava a le atunuu: *E lē o le fale ao le anofale.* O upu o loo faasili ai le taua o le anofale poo totonu o le fale i lo'o le fale i lona itu i fafo. Peitai, o le tatou mataupu o lenei aso, ua faatauaina ai mea ia e lua: O LE FALE MA LE ANOFALE. I le talitonuga, e leai se aoga e lelei ai le anofale ae faaletonu le fale. Pe lelei foi le fale ae faaletonu le anofale.

Faatinoga o le Mataupu:

1. O le tatou mataupu, ua faatusa le fale i le tagata atoa – ao le anofale ua faatusa i ai le loto o le tagata. E mafai ona iloa le anofale i foliga vaaia o le fale. O le fale foi, o le ata vaaia lea o le anofale. O le tatou galuega faatino, o le sailiili lea o le Autalavou i soo se tala o le Tusi Paia, o loo atagia ai ni fale ma ni anofale lelei. Ma fale ma anofale le lelei.

Fesoasoani mo le Mataupu:

1. *Apelu* – o taulaga na ofoina ai mea lelei mo le Atua. O le loto fai mea lelei, e mafai ona iloa i galuega ma faatinoga.

2. *Aperaamo* – Na tuu e Aperaamo le avanoa ia Lota e filifili ai se fanua mo ia. Na filifili e Lota le laufanua laulelei, ae tuu le laufanua maugā mo Aperaamo. Sa manatu lava le toatele, ua lē fiafia Aperaamo ia Lota. Peitai, na iloa le fiafia ma le talia lelei e Aperaamo o le faaiuga a Lota, i lona faatauanau i agelu a le Atua, mo se avanoa e faasaoina ai Lota ma lona aiga mai Sotoma ma Komoro.

3. *Iosefa* – o Iosefa sa agaleagaina e ona uso, peitai na faamagalo i ai Iosefa ma ave i ai meaai ma tausii lelei i le taimi o le oge. Ua iloa le anofale, ina ua iloa le loto faamagalo i ona uso na agaleaga ia te ia.

4. *Iuta* – O Iuta o le so’o o Iesu. O le vaai a tagata lautele, e tataua ona lelei le anofale poo le loto o Iuta. E tataua ona alofa ia Iesu. Peitai, o lea ua iloa manino le anofale, ina ua ia faalata ia Iesu. Ua eseese ai le vaai i le fale – o le so’o o Iesu ma le anofale – ina ua ia faalata i lona matai.

5. *Raava* – o le fafine talitane ae mata’u i le Atua. O le vaai i le fale – o le talitane, e loto i mea a le lalolagi, peitai o le anofale, e fefe ma mata’u i le Atua. O le iuga, na faaolaina lona aiga atoa. Ma nisi lava tala o le Tusi Paia, e fesootai ma le tatou mataupu.

Faamanatu: E iloa lou sui Autalavou i au faatinoga ma amioga

Aso Sa: 16 Aokuso 2020

Mataupu: E PULE LAVA LE ATUA

E i ai taimi e lagona ai le faavaivai pe afai e maua i tatou i le matapoto o le fili ma ana mailei. O le isi lea mafuaaga o le pule i le ola, o le mā i le tauleagaina. Peitai, o loo molimau le Tusi Paia i nisi o tagata na filifilia ma faaaogaina e le Atua mo ana galuega e ui i o latou vaivaiga faaletagata.

Avea lenei mataupu o se faamalosi mo i tatou o tupulaga talavaou, pe afai e maua i tatou e le matapoto o le fili. O le mea taua, ia tatou lagona le salamo ma saili i le Atua mo se faamagaloga ma faamoemoe i lona tofofi mai i ana tofiga amiotonu.

Faatinoga o le Mataupu:

1. Tagata ua filifilia mo le tatou mataupu: *Aperaamo, Iakopo, Mose, Tavita, Peteru, Samasoni, Asueru, Arona, Miriama Kitiona.*

2. Faitau ma faasoa poo a vaivaiga o nei tagata ma auala na faaaogaina ai e le Atua.

Fesoasoani mo le Mataupu:

1. Aperaamo – Na pepelo Aperaamo e lē o sona toalua Sara.

2. Iakopo – Na ia fao manuia o Esau.

3. Mose – Fasioti le fitafita Aikupito ae nana i le oneone.

4. Tavita – na oti i luga o le moega, e lei oti i se taua faapei o Saulo le tupu.
5. Peteru – faafiti ia Iesu.
6. Samasoni – avaga gofie lona loto i upu a fafine faapaupau.
7. Asueru – fai onā ana faaiuga mo Vasati.
8. Arona – o le taitai o le nuu ae lolo i manatu faiaina o tagata.
9. Miriama – tomumu i auauna a le Atua.
10. Kitiona – ola masalosalo i nisi o taimi.

O nisi ia o fesoasoani mo le tatou mataupu. Ma e toatele foi isi tagata o le Tusi Paia o loo faamauina o latou vaivaiga. Peitai, na faaaoga lava e le Atua mo lana feau. O le soifuaga lenei, e i ai lava taimi e iloa ai lo tatou vaivai ma faaletonu. O le feau mo i tatou le Autalavou, ia aua lava nei muta le faamoemoe. O le measili ona taua, o le loto e salamo faamaoni ma toe saili i le Atua mo ana faamanuiga. Ia toe faamanatu, o le onosai o Iopu i puapuaga ma le mataga, na toe faaeaina i faamanuiaga a le Atua.

Aoaoga mai le Mataupu:

1. E leai a se faiva e asa ma se maumau
2. E taua le iloa o le mea sese ma aoaoina ai mo le agai i luma
3. E tele isi galuega ua saunia e le Atua mo i tatou pe a moni lo tatou salamo mai leaga ua faia.

Faamanatu: E pule le Atua i ana tofiga!

Aso Sa: 23 Aokuso 2020

Mataupu: O LE TUSI A LE PEROFETA O SAPAKUKA

Sa galue Sapakuka i le malo o Iuta – Southern Kingdom. Na tusia le tusi i le tausaga–TLM 600. O le galuega faaperofeta a Sapakuka e foliga tutusa ma le faataotoga o le tusi o Iopu. O nei tusitusiga, o loo fesiligia ai e le tagata (Iopu ma Sapakuka) faaiuga a le Atua.

O ai Sapakuka? O loo i ai le finauga, o Sapakuka o le osi taulaga. O le mafuaaga lea o le tuu fesilisili o Sapakuka, pe aisea ua lē faasalaina ai le tagata agasala.

I le aotelega o le tusi a Sapakuka ua mafai ona vaevaeina e faapea:

1. *Sapakuka 1: 1-4* – Ua fesiligia e Sapakuka: Pe aisea ua lē faasalaina ai le tagata amioleaga e le Atua.
2. *Sapakuka 1:5-11*- O le tali a le Atua i le fesili a Sapakuka, ma faailoa le faasalaga o le tagata amioleaga e ala i le malosi o Kaletaia poo Papelonia i nisi o lomiga.
3. *Sapakuka 1:12-2:1*- O le fesili lona lua a Sapakuka i le Atua pe aisea o le a faaaoga ai le nuu – Kaletaia/Papelonia e faasala Iuta. Ao Kaletaia e sili ona leaga a latou amio i loo Iuta.
4. *Sapakuka 2: 2-20* – O le tali lona lua a le Atua ia Sapakuka, e faasalaina foi Kaletaia/Papelonia. O le pule aoao a le Atua, e faia ai o soo se faaiuga i lona lava Silisili Ese ma le Amiotonu
5. *Sapakuka 3:1-19* – O le faafetai a le Perofeta i le Atua ona o auala ua ia saunia e faaoo ai le faasalaga i tagata agasala.

Faatatau mo le Autalavou:

E i ai taimi tatou te fesili ai foi faapei ona fesili Sapakuka i le Atua, aemaise pe a tatou iloa, o loo ola manuia le tagata e lē fiafia i le lotu ae tigaina pea i tatou o ē ua fiafia i le lotu. Tatou te fesili ai: **Pe aisea e manuia ai le tagata lē lotu ae pei e faalēmanuia i tatou e lolotu i aso uma?** (*Tatala pea le avanoa mo tali a le Autalavou*)

O nisi o aoaoga e mafai ona maua mai le tusi a Sapakuka:

1. E lē afaina i le Atua fesili amiotonu mai ona tagata faatuatua.
2. E lē teena e le Atua lou manao i soo se taimi.

Faamanatu: E i ai le tau'i o a tatou agasala

Aso Sa: 30 Aokuso 2020

Mataupu: Finauga – E LEAGA LE TUPE!

A leai ni tupe ua lē mafai ona faataunuu le tele o fuafuaga ua tatou manatunatu i ai. Peitai, ua molimauina nisi o faafitauli ogaoga ua aliali i nei aso, ona o le tupe.

O le tatou mataupu o le finauga – debate. Tatou te finauina ai poo a itu lelei o le tupe ma itu e leaga ai le tele o tupe.

Faatinoga o le Mataupu:

1. Ia vaevae le Autalavou i vaega e lua – Vaega Ioe ma le Vaega Tetee.
2. Filifili pea e lau Susuga le Taitai nisi e fai ma faamasino o le finauga.
3. Ia lava ni mau e lagolagoina ai finauga a vaega taitasi. Ia lē gata i mea o loo tutupu i aso uma (social issues) ae faapea foi i tala o le Tusi Paia (Biblical references).

Tuu pea i le faamasinoga a faamasino poo le fea le itu e manumalo.

O le faamoemoe maua luga o lenei mataupu, ia aoaoina i tatou le Tupulaga i auala e taua ai le tele o tupe ma itu e leaga ai le tele o tupe.

Fesoasoani mo le Finauga:

E taua le tupe mo atinae i soo se auala. O le auala o fefaatauaiga. O la le Tusi Paia, e le iloa se faatuatua i galuega faatino. Ao galuega faatino, e faatino i tupe.

E leaga le tupe ona o itu nei:

- E oia ai le va nonofo o tagata – e avea le tele o tupe ma ala o le lē faaaloalo i tagata matutua
- O le tupe ua faaseseina faaiuga amiotonu i nei aso. Ua aafia ai soo se faalapotopotoga. Ua atili mafatia ai tagata vaivai ma tagata matitiva ae saoloto ai le tagata atamamai ma tagata tamaoaiga.
- Totonu o aulotu, ua siisii maua luga saoga a i latou e tele tupe ae ua atili faavaivai ai i latou e vaivai le tamaoaiga.
- Ua avea le tupe ma auala ua faavaivaia ai nisi i le lotu

E taua tupe i le faatinoina o le ola tautua i le lotu ma atinae o aiga ma soo se mea. Peitai e leaga le tupe, pe afai e faatau ai le amiotonu o ni faiga le sa'o. Pe afai e afaina ai le soifua o nisi ma galo ai le Atua o lē ana tupe.

Faamanatu: Faaaoga tatau tupe mai le Atua

Aso Sa: 6 Setema 2020

**Mataupu: O IESU SA TAMAOAIGA, A UA FAAMATIVAINA -
2 Korinito 8:8-15**

O le mataupu o lenei Aso Sa, o le a tatou faasoa ai i le fuaitau lea o loo taua i le tusi a Paulo mo le Ekalesia i Korinito. O le faamoemoe, ia aoao mai lenei fuaitau taua i le soifua tautua mo le Atua ma lona finagalo.

Faatinoga o le Mataupu:

Faitau le Tusi ua filifilia ma faasoa faatasi le Autalavou.

Nisi o Fesili e taiala ai le tatou mataupu:

1. E faapefea ona tatou iloa – O le Atua sa tamaoaiga?
2. O a ni auala ua iloa ai le faamativaina o le Atua ona o i tatou?
3. O le a sa tatou tali i le Atua ua faamativaina ona o i tatou?

O fesili ia e tau tatala ai le mataupu. O le faamoemoe, ia matua manino le Autalavou i le uiga ua faamativaina ai le Atua ona o i tatou.

Fesoasoani mo le Mataupu:

O le tala faitauina, o le toe faamanatu lea a Paulo i le Ekalesia i Korinito e faatatau i le ola foai mo le Atua ma lona finagalo e tauala atu i le foai o loo faamaopoopoina mo Ierusalema. O loo manino lava upu a Paulo: f.8 –‘e le o sa’u upu poloai lenei...’ e le o se poloaiga a Paulo le faia o le foai mo Ierusalema. Peitai, o le foai sa faia muamua e le Ekalesia (f.11. *O lenei foi, ia outou faauma ona fai, faapei ona outou fiafia i le loto i ai, ia faapea foi ona outou faia i mea ua ia te outou*). O le faamalosi a Paulo, ina ia toe faaauau ia galuega lelei. O le taua e Paulo o le Atua ua faamativaina, o se toe fafagu lea i le ola tauua o tagata faatuatua i Korinito. O le faamoemoe o le Aposetolo, ia aoaoina tagata ina ia toe manatua le Atua na tamaoaiga, a ua faamativaina, ina ia faatamaoaigaina i tatou. O le naunautaiga o le Aposetolo, ia faia le foai ona o le alofa i le Atua ua faamativaina. Aua nei faia ma le faatauanae ae ia faia ma le loto i ai. O le loto e lelei, o le loto fuatia ifo e lelei, e tatau ona faia ai le foai.

O le aoaoga mo i tatou o le Autalavou, ia fai sa tatou galuega e tau ai le alofa mai o le Atua. O Lē na tamaoaiga, i le mamalu ma mea uma, ae ua faamativaina, ina ua liutino tagata e ala ia Iesu Keriso. O lona finagalo, ia faatamaoaigaina i tatou i le oa faaletino, mafaufau ae sili i meaalofa o le Agaga.

Faamanatu: Ua faamativaina Iesu ona o i tatou

Aso Sa: 13 Setema 2020

Mataupu: O LE TUSI A LE PEROFETA O SEFANAIA

O Sefanaia, o le atalii o Kusi, o Kusi o le atalii o Ketalia, o Ketalia o le atalii o Amaria, o Amaria o le atalii o Esekia – 1:1. Na galue faaperofeta Sefanaia mo Iuta i le vaiata o avea Iosia ma tupu – TLM 641-609. Ao le tusi na tuu faatasia i le TLM 627. O le galuega faaperofeta a Sefanaia o loo faasino tonu ia Iuta (Southern Kingdom) ma le faasalaga o le a faia e le Atua mo i latou ona o agasala ma le ifo i tupua. I le tala faasolopito, na taunuu le faasalaina o Iuta ina ua faatafea ma pulea e le malosia o Papelonias.

Aotelega o le tusi o Sefanaia:

- 1:1 - Valaauina o Sefanaia mo le galuega faaperofeta mo Iuta
1: 2-18 - Ole faasalaga o le a oo ia Iuta. O le aso o le pogisa ma le tagiaue.
2:1-3 - E liliu ese le Atua mai lona toasa pe a salamo le nuu.
2:4-15 - O le toasa o le Atua e aofia ai: Filisitua (4-7), Moapi (8-11), Aitiupe (12) ma Asuria (13-15).
3:1-7 - O puapuaga o faasalaga ona o le ifo i tupua
3:8-20 - E manuia i latou e salamō ma faatuatua i le Atua.

E pei lava o isi tusitusiga faaperofeta, e mulimuli mai i puapuaga le faamanuiaga mo i latou e salamō faamaoni ma fo'i e faia le finagalo o le Atua.

Feau tupito o le Tusi o Sefanaia: O le taimi nei -Now – Sefanaia2:2-3

Ia salamo tagata uma i le taimi nei, ina nei oo mai le toasa o le Alii.

Faamanatu: Aua le ifo i tupua!

Aso Sa: 20 Setema 2020

Mataupu: E LĒ FALALA FUA LE NIU

“E lē falala fua le niu” –o lona uiga, e i ai le mafuaaga o mea uma. Ua faatupulaia le tele o faalavelave e tutupu i lo tatou atunuu.

O faalavelave e aofia ai:

- | | |
|--|---------------------------------------|
| (1) fasioti tagata | (5) faaiuga piopio |
| (2) pepe ua lafoai i le lapisi ma le sami. | (6) taufaamata'u ma lafoga taufaafefe |
| (3) pule i le ola. | (7) gaoi ma le talepe fale. |
| (4) sauaina o tina ma tamaitai. | (8) amioga mataga i fanau teine. |

E manatu le mataupu: *E lē falala fua le niu*. E i ai le mafuaaga o nei faalavelave ogaoga ua tutupu isi o tatou atunuu.

Tatou talanoa ma faasoa ina ia maua so tatou malamalama ini auala pe aisea e mafua ai, ae poo a foi ni auala e foia ai nei faafitauli.

Faatinoga o le Mataupu:

Ia faasoa le Autalavou i fesili ua tuuina atu mo le faalateleina o le mataupu:

- (1) O le a le faapogai o nei faalavelave?
- (2) O lelei le galuega faufautua a matua i fanau?
- (3) O lelei le galuega faata'ita'i i aiga, nuu ma le atunuu?
- (4) O lelei le galuega a faifeau i nuu i le folafolaina o le finagalo o le Atua?

O nisi ia o fesili mo le talanoaga. O le faamoemoe, ia aoaoina i tatou le tupulaga i mea ua tutupu ma ia aoga le faasoa o le Mataupu e mau manatu ai mo le agai i luma.

Fesoasoani mo le Mataupu:

Ma o le talitonuga o le tatou mataupu, e le faalala fua le niu. E i ai le faapogai o nei faafitauli ua aafia ai le tele o soifua. Ma ua matua fesiligai ai le galuega a matua, o faifeau, o le pule a Alii ma

Faipule i totonu o aiga, o nuu, atunuu aemaisea lava le Ekalesia. E leai lava se matua e aoao lana fanau ia faia o ni mea leaga. O taitai foi o aiga, nuu ma le atunuu, e naunau lava ia lelei tagata uma. E faapena foi le galuega faafaifeau, o loo lelei ma sologa manuia pea mea uma. Peitai, o nei mea uma e mafua mai lava i le **LOTO o le tagata**.

O le loto o le tagata, e fuatia ai ana filifiliga ma faaiuga e faia i lea taimi ma lea taimi. Po o le a lava le naunau atu o matua, o ta'ita'i, ma faifeau, e pule lava le tagata ia i lona loto. Peitai, o le itu taua lea o le mafuta ma tatalo i le Atua. Aua afai e pulea e le Atua le loto o le tagata, ona mautinoa lea ua tauleleia ana mea e fai. Ae afai e femoumouai o tatou loto i le Atua, o le iuga lea o le vaivai gofie i faiga a le tiapolo.

Mo i tatou le Autalavou, ia toaga e tatalo ma mafuta i le Atua. E leai lava se tagata e atoatoa. Ae tatau lo tatou faalatalata i le Alii, e maua ai mafaufauga lelei mo le manuia agai i luma.

Faamanatu: Ia loto i mea a le Atua

Aso Sa: 27 Setema 2020

Mataupu: O KAINO MA LE ATUA -Kenese 4:8-16

Fa'atinoga o le mata'upu:

Ia vaevaeina le autalavou i ni vaega se lua, ona fai lea ose finauga (debate) e fa'atatau i le tusi faitau. O le isi vaega e finau mai i le manatu "Na alu ese Kaino ona o le finagalo o le Atua".

O le isi vaega e finau mai na alu ese Kaino i lona lava loto.

*O le vaega e tele o latou manatu e lagolagoina ai lana mau, o le vaega lena e manumalo. Fa'amasino pea lau susuga a le ta'ita'i, ia pe tu'u foi i le fa'afeagaiga po'o se faifeau nofo aiga e fa'amasino ma fai se fesoasoani mo le mataupu.

Sina fesoasoani pu'upu'u mo le mataupu:

Ina ua agasala Kaino, ona fai lea e le Atua le fa'aiuga mo ia. E fa'asevasevaloina lona olaga, e malaia foi le lau'ele'ele ona o ia. O lona uiga ua malaia le lau'ele'ele o le a mau ai Kaino, e lē toe ola lelei foi ni mea toto i lea oga'ele'ele.

O le fa'amaoniga o lea fetalaiga a le Atua, o atunu'u uma o lo'o nonofo i le 'ele'ele na mau ai Kaino, e tele ina toafa. E le'i fa'apea na tulia e le Atua Kaino mai le lalolagi. Na pau le mea ua mautinoa, ua avea Kaino ma maumausolo, ma ua fa'asevasevaloina lona olaga.

Peita'i, o Kaino lava ua ia fai i le Atua, ua tulia o ia e le Atua mai le lau'ele'ele o lo'o mau ai. Ua ave'ese e le Atua mai le mea sa manuia ai ona o lana agasala. Ua leai se avanoa e toe mafuta ai ma ona matua po'o lona aiga, ona ua ia le fa'alogi i le Atua.

Faimai le talitonuga o nisi o le au su'esu'e o le Tusi Paia, o le mea lea ua feoa'i solo ai tagata Saina ma tau saili ni mea e mau ai, ona o latou ia e tupuga mai ia Kaino. E fa'apena foi i tagata Initia.

Ia ta'atia ia po'o ai tagata na tupuga mai ia Kaino, ae o le mea e fia tulituliloa, o le tagata ua alu ese ma le Atua. Pe na tulia e le Atua pe leai foi, ae ua mafua ona le fiafia le tagata, ona ua alu ese ma le Atua.

Ua tele talavou ua a'afia lo latou ola fa'aleagaga, ona ua latou o ese ma le Atua. O le a le uiga o le alu ese ma le Atua? Ioe! Ua le fiafia i faigalotu i aiga i afiafi, ua fiafia e inu pia i le Aso Sa ma tafao ai, ae ua le alu ise lotu.

Manatua, e ui lava ina fetalai le Atua ia Kaino ua fa'asevasevaloina lona olaga, ae sa alu lava ma le puipuiga a le Atua. Fetalai le Atua ia Kaino, "O se nate fasioti ia te oe, e tauia faafitu o ia". O lona uiga e le i alu ese ai lava le alofa o le Atua.

E i ai taimi tatou te manatu ai ua tu'ulafoaiina i tatou e le Atua, ma ua na le toe manatu mai ia i tatou. Aua nei galo, e le mafai lava ona tu'ulafoai'ina i tatou e le Atua. A'o i tatou lava ua tatou o ese ma le Atua, ua afua ai ona feagai i tatou ma puapuaga. Ae o le Atua, o le Atua alofa ma tu'u avanoa pea i le tagata, ae le se Atua fasioti tagata.

O le upu moni, e le i faia e le Atua se fa'aiuga ia Kaino ina ia alu ese, ae o le fa'aiuga na faia e le Atua, o lo'o i ai pea ma le avanoa e toe fa'alelei ai lona olaga, peita'i, o ia lava ua fia alu ese ma le Atua, ma ua ia toso se pupuni e lilo ai o ia mai le silafaga a le Atua.

Mo tupulaga, afai ua tatou iloa ua tatou mamao ma le Atua, aua le alu ese atili, ae toe vaai lelei po'o fea o ta'oto ai le auala aga'i i le manuia, ona e toe fo'i lea i ai, aua o lo'o fa'atali mai pea le Atua mo lou toe foi atu.

Faamanatu: O le alu ese ma le Atua, e lē maua ai se fiafia.

Aso sa: 25 Oketopa 2020

Mataupu: SUESUEGA I LE TUSI O IOSUA

O lenei suesuega, o le pepa na saunia e le Susuga Isamaeli Aulai (FS) –o le sui o le Matagaluega a Lepa, Lotofaga ma Aleipata –L.L.A. O le pepa na saunia mo le Mafutaga Faifeau ma Aoao o le Matagaluega –(L.L.A). Ua manatu e avea o se mataupu mo sailisiliga a Autalavou o lenei tausaga 2020.

1. O ai Iosua?: O Iosua e tupuga mai i le a'a o le aiga o Efaraima (Num 13:8). O se taulealea sa usitai ma faalogo ia Mose. O se taulealea sa taulamua. Sa faaaoga lona malosi mo le Atua. O se taulealea sa vaai ona mata faalogo ona taliga, lima ma vae iai faatonuga a Mose. O le igoa Iosua e uiga tutusa ma le igoa Iesu – ***O le Atua e faaola mai (God saves)***. O le pine faamau lea o le galue mai Atua e ala i lona nuu o Isaraelu. O le alofa fai paaga o le Atua ma Isaraelu, lea na le gau ai le tao ma agiagia pea le fu'a o le manumalo ia Isaraelu i le malosi faafitafita. E faaola e le Atua lona nuu pe a tumau lo latou faatuatua faamaoni.

2. Anotusi o le Tusi o Iosua:

Mataupu 1: *Ua tofia Iosua e taitai le nuu i Kanana. Tau ina e faamalosi ma loto tele,,ia e anaana i tulafono, aua e te alu ese ai i le itu taumatau poo le itu tauagavale. Finagalo lea o le*

Atua e lima taitaiina ai le tulai mai o Iosua. O le valaauina e le manaomia ai le se ese mai ala o le Atua e pei ona sa to'o mai ai le sa o Mose ma Isaraelu. O nisi o upu o lo o faapea mai ..*aua e te fefe*.. O le galuega faa-taitai e le manaomia le fefe, e manaomia le toa o le loto ma ia o faatasi le avea ma taitai ma le amio e tatau. O le valaauina lava ia o Iosua ua uma ona faalanu e le Atua i lona mana silisili ese, le ala lea na le maluia ai le taitaiga a Iosua i se isi lava malosi.

Mataupu 2: *Raava ma Tagata asiasi faalilolilo e toalua.* Na faalogo lenei tina o Raava na savavali Isaraelu i le alititai matutu. Ona avea lea o le faalogo a lenei tina e fai ma tala lelei, e momolia le talitonu i lona loto ma le mafaufau, e moni ma faamaoni le Atua o Isaraelu. O le tali leleia e lenei tina o tagata asiasi, o le ala lea o le faaolataga mo ia ma lona aiga. O le fu'a mumu ua faatonuina e fai ma faailoilo, e faamoemoe tutusa ma le toto na vali ai pou o fale o Isaraeli i Aikupito lea na sopoloa ai le toasa o le Atua mai fale o Isaraelu. Aua ua na'o Rava ma lona aiga na faasaoina mai ina ua soloia pa o Ieriko.

Mataupu 3: *Ua oo le nuu i le vaitafe o Ioritana.* Ua amata ona mamalu le taitaiga a Iosua i faailoilo o le mana auai o le Atua. Ua savavali Isaraelu ma le atolaau a le Atua i le alititai o le vaitafe o Ioritana faapei ona faia i le sami ulaula. O le vaitafe o Ioritana o lo o fai ma tuaoi e ta vavae ai le Isaraelu maumausolo i le vao ma le Isaraelu ua i o latou laufanua na folafola iai e le Atua.

Mataupu 4: *Ma'a Faamanatu e 12.* E lua maa faamanatu na faia e Iosua – o le tasi i totonu o le vaitafe o Ioritana i le alititai na savavali ai Isaraelu ma le tasi i Kilikala i le nofoaga sa tolauapi ai. O le faamoemoe o nei maa – ina ia manatua ai pea vavega ofoofogia na faia e le Atua mo Isaraelu.

Mataupu 5: *Faaperitomeina/ Paseka Muamua i le nuu folafolaina.* O nisi o fanau a Isaraelu sa fananau i le vao e lei peritomeina e tusa o le aganuu ma tulafono o le faamamaina faa-Isaraelu. Lea la ua faatonuina ai e le Atua Iosua ina ia faia e tusa o le agaifanua. Na to lauapi i Kilikala ma faia ai le 'aiga o le paseka e saga faamanatu ai pea le alofa fai vavega o le Atua.

Mataupu 6: *O le siosioina o Ieriko.* O le faatoilaloina o pa malolosi o Ieriko o le faaalua lea o le mana silisili ese o le Atua. Ua iloa atu e Iosua ma Isaraelu atumauga mauualuluga i le itu i matu i sasae, o le ogatotonugalemu lena o Kanana. O atumauga ia lea e manao Iosua e fia taunuu iai e faigofie ai ona pulea Kanana. Peitai o le mea lea e tupu, o lea e pito mai luma Ieriko ma ona pa malolosi. Manino le tala i le toulu ai o pa o Ieriko. Ao le ta'ua ai o le numera fitu i le mataupu lea – o le faaalua lava o le atoatoa o le mana laveai o le Atua mo Isaraelu, ma le manumalo a'ia'i o Isaraelu.

Mataupu 7&8:29 : *O le agasala a Akana ma le malaia na tupu ai.* Na pei e manatu faatauvaa Isaraelu ia Ai ona o le toaitiiti, peitai na avea le toaitiiti ma ala na liu suavai ai le malosi ona ua pei ua leai se malosi mai le Atua. E lei tupu fua ia mea, aua na silafia lelei e le Atua le agasala a Akana ina ua ia ave faanana le vete mai le aai o Ieriko. Mulimuli ane, e tauia le agasala ae tumau le alofa o le Atua mo Isaraelu. O le Atua faamagalalo na afua ai ona toe faatoilalo e Isaraelu Ai ma ana fitafita malolosi.

Mataupu 8:30 -35: *Faamauina tulafono i le mauga o Evala.* O le toe faamauina o tulafono o le faatonuina lava lea o le faatonuga sa faia e Mose ia Isaraelu ma ona taitai (Teuteronomie 27:4).

Mataupu 9-10: *Ua tumau le la.* Ua oo atu le malosi o mana o le Atua o lo tau ai Isaraelu i le aai o Kipeona. O Kipeona e i le itu i Matu Saute pe a ma le 6 maila mai ia Ieruselema. O se aai e fai lava si telē, peitai e lei mafai lava ona sao mai i le mana auai o le Atua sa ia Isaraelu. O le toatele o Kipeona lea lava na tatalo ai Iosua i le Atua ia faa tumau lonala i luga o Kipeona ma le masina i le vanu o Ailona, sei faa-mae'a lelei le faatoilaloina o fitafita Kipeona.

Mataupu 11: *Faatoilaloina nuu o le itu i Matu.* Ua uma ona faatoilalo nisi o tupu o le itu i Saute e pei ona iai Kipeona, ao lea o le a faasolo atu Iosua ma lana autau agai i le itu i matu. Manatu Iosua e tolauapi i Meroma e faigofie ai ona latou maua uma ai laufanua. O le alafua lava ia a Iosua ina ia ta vavae ese mai le itu matū ma le itu i saute, ona osofai lea o le ogatotonu ina ia faigofie ona pulea atoa itu uma o Kanana. Ua tau malosi pea Isaraelu ona o le mana auai o le Atua.

Mataupu 12: *O Tupu na Fasiotia.* O loo faamauina ai tupu e 31 o atunuu taitasi sa faatoilaloina e Isaraelu. Lea lava ua faana'e mai le tai o Isaraelu i laufanua o Kanana ma ua taitasi ma nofoia laufanua o le nuu folafolaina. A ua tumau pea le malosi o Iosua ona o le malosi lilo o lo o aiaiuili mai tua.

Mataupu 13-22: *Vaevaega o laufanua o Kanana.* O le vaega lea o le tusi o lo o ua faamauina ai le vaevaega o eleele o Kanana i ituaiga e sefululua o Isaraelu. O le mataupu tupito lea o lo o faatalitali ai Isaraelu, o eleele ma fanua o le a fai mo latou tofi e faavavau. O lea o le a fai tofiga o fanua sa folafolaina iai e le Atua. Ua taunuu folafolaga sa tu'u fofoga mai, ua faatoilaloina tagata sa nofoia Kanana, ua tatupu le moemoe fou o Isaraelu, ua taulimaina le matupalapala mai le Atua.

(Silasila i faafanua o loo i tua o le Tusi Paia, o loo iloa ai le vaevaaina o fanua mo ituaiga e 12 o Isaraelu)

Mataupu 23 – 24: Upu Faamafanafana a Iosua

3. Nisi o Aoaoga mai le Tusi o Iosua:

1. O eleele & fanua o le tasi lea o aoaoga i le tusi o Iosua. O eleele o Kanana ua foai e le Atua mo Isaraelu ma le faamoemoe o le Atua ina ia latou tumau pea i le Atua e ala i le tausia o Tulafono ua taiala ina le ola i aso faisoo.

2. Taunu'u folafolaga (God fulfill his promises). Ua lagomau i tiasa Tama sa tuu fofoga iai e le Atua le folafolaga i le nuu e tafe ai le suasusu ma le meli (Kanana). Tuanai le faigamalaga sa a'e i le mauga ma ifo i le vanu, fiaai ma fia feinu, tua i le tomuu ma le faitio. Ao lea ua vavala ata o ta'u leleia ma ua iite fanualalo ina ua vaaia atumauga ma laufanua o Kanana. Le Atua faamaoni lea, lea ua molimau ai Iosua e ui sa faalogo ai ona taliga ao lea ua vaai tino ona fofoga i le taunuuga o le folafolaga.

3. E tau le Atua mo ona tagata faatuatua (God fights for His people). O le tusi lava ia o Iosua i se manatu faigofie, o le tusi o taua (war). O le faatofalaiga o le toto masaa sa feutana'i ai Isaraelu ma le tele o nuu sa nonofo i Kanana. O le feau a Iosua, e leo se malosi tulagaese ma se atamai faa-militeli ia Isaraelu. Ao le faalia o le mana silisili ese o lo latou Atua moni. Aua se a ea se malosi o le soona leotetele o leo o pu e afua ai ona toulu i lalo pa malolosi o Ieriko??(Ios 6:1-

21) O ai foi ua fai ma taitai au ia Iosua ma Isaraelu??(Ios 8:1). Ao ai foi ua na mafaia ona faatumau le la sei tumau le taimi e tau ai le taua??Ua nao le Atua ma lona malosi ma le silisili ese.

4. E tauia le agasala (Sin will be punished). O le gagana a le atunuu *e ifo a le fuiniu i le lapalapa*. O le mataupu e 7 o lo o manino ai le Atua e iai lana faamsinoga amiotonu mo le tagata. O lo o faamauina le agasala a Akana ma le tau na tuu iai e le Atua. O le faamoemoe tupito lea o lo o naunau ai le Atua mo lona nuu. Ia ola usitai i tulafono aemaise ia tausisia lo latou fai paaga pea ma le Atua. O le faaalua o le faamasinoga amiotonu a le Atua ia Akana, e le'o le tetee ia Isaraelu poo Kanana. Ao le tetee i le ola agasala ma le le usiusitai o Isaraelu.

5. Auaunaga mo le Atua. (Serve the Lord). Manino i upu faafeiloai i le Tusi o Iosua le fesuaiga o nofoa o auauna e toalua. Ua oti Mose ae seei ane Iosua. O le auaunaga a Mose ua faaauau e Iosua – ao le avea ma auauna o le ave atoa loa lea o le malosi ma le ola e faaogaina ma mea faigaluega e galueaina ai le finagalo o le Atua. “...*Ina filifili ia outou i le aso nei po o ai tou te auauna i ai, po o atua sa auauna i ai o outou tama, o e sa i le la itu o le vaitafe, po o atua o sa Amori,,,,,a’o a’u nei ma lo’u aiga matou te auauna i le Alii*”(Ios 24:15)

Aso Sa: 1 Novema 2020

Mataupu: O LE TUSI A LE PEROFETA O HAKAI

I le vaeveaina o Perofeta o le Tusi Paia, o toatolu Perofeta o loo faamauina na galulue i le vaitau o le toe foi o le tafeaga na feagai ma Iuta ma Isaraelu: **1. Hakai, 2. Sakaria, 3. Malaki.**

O le toe foi ai o le tafeaga na feagai ma le nuu o le Atua, e lē o ni taimi faigofie mo i latou. E tele faafitauli sa feagai ma le nuu o le Atua. E le gata o le toe atiae o mea uma, ae o le feteenai o manatu ma lagona o tagata, o le mea sili lea ona faigata. E toe ane le tafeaga, o loo i ai lava i latou sa faatotoe (remnant) i le nuu. Ia manatua, o le tafeaga, na ave lava na o tagata atamamai ma tagata malolosi. Tagata e mafai ona latou faia o galuega aua le manuia o nuu na faatafea i ai. Ae faatotoe tagata e le aoga i le atinae o ia nuu. O i latou (remnant) ia sa fai ma faafitauli i le toe ane o le tafeaga. O le mau tauave a tagata nei na faatotoe i Iua ma Isaraelu, o tagata o le tafeaga o tagata o nuu ese. Ao i latou o Isaraelu moni (pure Israelites). O lona uiga, e le tataua i tagata ua toe foi ane o le tafeaga, ona faia o le malumalu mo le Atua o Isaraelu. Ma isi lava feteenaiga i manatu, ona o le toe atinae o le nuu. Peitai, na iu lava i le sologa lelei, ma faagasolo ai lona galuega o le atiaeina i le pa, ma le toe fausia o le malumalu o le Atua – TLM539.

O le galuega faaperofeta a Hakai o le *faamalosi i tagata – encourages people* ma faamanatu le faamuamua o le Atua i soo se mea e manuia ai. O se galuega ua tataua ma onomea ona o le faigata o loto o tagata, i le tele o feteenaiga.

I le aoao mai o le Tusi Paia, e lē o se mea e lelei le ola tausili ae tigaina ai nisi tagata. E lelei lava si mea manumanu e maua ma le filemu. O le malilie foi o tagata uma e faatino se galuega o le mea sili lea. Poo a lava aluga e iu i ai, e talia ma le fiafia, aua ua malilie uma i ai. Ae lē o le tausili o le toatasi, ae tigaina ai le toatele.

Aoaoga mo le Autalavou:

1. E taua le tausili i le mea lelei, ae aua nei tigaina ai nisi.
2. Fai le mea ua gata ai le malosi.
3. Ia fuafua tatau faaiuga ma faatinoga, mo le manuia o tagata uma.

Faamanatu: E i ai le tuaoi o mea uma.

Aso Sa: 15 Novema 2020

Mataupu: ONOSAI I FAAOSOOSOGA - Iakopo 1:12

O le tasi lea o upu iloga a le Aposetolo o Iakopo mo le au faatuatua ua faasalalauina i le lalolagi.

Faatinoga o le Mataupu:

1. Faitau le tusi ua filifilia ma talanoa i lona fesootaiga i tofotofoga o le ola lenei.
2. O a ni tofotofoga e masani ona luitauina ai le ola faaleagaga o le Talavou?
3. E mafai ona tatou onosai i nei faaosoosoga e tusa o a'oa'oga a Iakopo?
4. O a ni lu'itau o le ola tautua i le lotu?

Fesoasoani mo le Mataupu:

O nisi o tala o le Tusi Paia, o loo taua ai tagata na faaeaina ona o le **onosai i faaosoosoga:**

1. *Iosefa ma ona uso:* O uso o Iosefa na agaleaga ma faatau ese atu Iosefa. Peitai, na faaeaina Iosefa i faamanuiaga ona ua manumalo i ia lu'itau o le ola. Na ia faamagalo ona uso, ae tau ai le leaga i le lelei. *O i ai ni Iosefa loto faamagalo i le tatou Autalavou?*

2. *Tavita:* E tiga lava le augani atu o Apisai le tama a le tuafafine o Tavita ina ia fasioti ia Saulo, ae na fefe lava Tavita, ona o Saulo o le auauna faauuina a le Atua. Na faaeaina i le ave ma tupu, ona ua manumalo i le faaosoosoina e faaoo le oti i le auauna faauuina a le Atua. *O i ai se Tavita, ola mata'u i auauna faauuina a le Atua i le tatou Autalavou?*

3. *Tanielu:* O le tagata talitonu i le Atua, na tuuina sese e tagata ona o tofiga na ia maua. E leai se tetee o Tanielu i le faaiuga na faia pe suia ai lona talitonu i le Atua Soifua. O le faailoga o le tagata ua manumalo i tofotofoga o le ola inosia ma le amusia ona o faamanuiaga ua maua. Na faasaoina e le Atua mai leona, ona o le faatuatua. Na faatumauina tofiga mo Tanielu, ona ua manumalo i le ola inosia ma le amusia e tagata. *E toafia ni Tanielu o loo i le tatou Autalavou, e mafai ona manumalo i le ola inosia ma le faifai mai o tagata?*

E tele tofotofoga masani o le olaga e feagai pea ma tupulaga talavou e pei: fualaau faasaina, ava oona, tafaoga i taimi o pese ma faigalotu, o le augata e alu i le lotu, tafaoga if ale kalapu ma siva e faia i le po ma isi lava tofotofoga e iu ai ina afaina le ola faaleagaga o le fanau.

O le faamoemoe o le mataupu, o le faamautinoa i loto o le Aualavou, e lē ta'uvaleina lou manumalo i tofotofoga o le ola leni. E pei ona faamalosi le Aposetolo o Iakopo: *Amuia le tagata o lē onosai i le faaososoga; aua a uma ona tofotofoina e maua e ia le pale o le ola, ua folafolaina mai e le Alii i e alolofa atu ia te ia.* O le alofa i le Atua, e lē na o upu, ae ia iloa i le faatuatua. O le faatuatua e mafai ai ona manumalo i lu'itau ma faigata o le ola leni.

Faamanatu: E i ai manuia o lou ola onosai i faaososoga

Aso Sa: 22 Novema 2020

Mataupu: O LE TUSI A LE PEROFETA O SAKARIA

E taimi faatasi Sakaria ma Hakai i le galuega faaperofeta. O taimi ua toe foi le tafeaga (postexilic). Taimi o le toe atiae o le nuu o le Atua i vaega uma aemaise lava i le malumalu tapuai. O Sakaria e tupuga mai le aiga osi taulaga na toe foi ane mai le tafeaga. O le osi taulaga ae na galue faaperofeta faapei o Ieremia ma Esekielu. Na tuufaatasia le tusi i le vaitau o le: TLM520-TLM 518.

E tolu vaega tetele ua mafai ona vaevaeina i ai le tusi atoa:

1. Sakaria 1:1-6 – o le valaau mo le nuu o le Atua, ia loto atu i le Atua. Ia fultua i agasala ae foi i le Atua e manuia ai o latou faamoemoega.
2. Sakaria 1: 7-6:8 - O failoilo/visions e valu (8) e faatatau i le toe fausiaina o le malumalu
3. Sakaria 6:9-15 – o le faauuina o Iosua le atalii o Iosataka le faituagala sili e faia le faia.
4. Sakaria 7:1-8:23 – o le faamamaluina o le anapogi mo galuega o loo faia.
5. Sakaria 9:1-14:21 – Valoaga mo le Mesia o le a Afio mai.

Feau tupito o le Tusi:

1. Faaumatia le malosi o nuu ese, ae faatumauina Isaraelu ma Iuta i lona mamalu.
2. O le taua o le ola faamamaina i luma o le Atua.
3. O le Mesia o le a Afio mai mo tagata faatuatua.

Aso Sa: 29 Novema 2020

Mataupu: O LE TUSI A LE PEROFETA O MALAKI

O Malaki o le osi taulaga mai le ituaiga o Sepulona. O le mafuaaga lea o le faamamafa o le tusi agai i faiga piopio ua aafia ai tapuaiga ma tiute faaosu taulaga. O se popolega lea ia Malaki, ona o le mamalu o le Atua, ua tuuitiitia i faiga piopio a tagata o le Feagaiga. Na tuufaatasia le tusi i le tausaga TLM 440, ina ua foi le tafeaga.

Ao i ai le nuu i le tafeaga, sa mafuli folafolaga a Perofeta i vaega nei:

1. E sau le aso e saoloto ai le nuu mai pulega a nuu ese.

- | | |
|--|--------------------------------|
| 1. Bingo i le po | 5. Fiafia e inu ai le ava oona |
| 2. Taaloga tupe (poka/ pele suiipi/voli) | 6. Siva e faia i le po |
| 3. Tafaoga tietie i le taavale | 7. Tausala e faia i le ao. |
| 4. Tafaoga i le matafaga | 8. Matamata i le fale tifaga |

(Ma nisi fiafiaga e mafai ona faailoa mai e le Autalavou)

O nisi ia o fiafiaga ua filifilia. Ia sauni pea lau susuga i le taitai e faamasino poo fea le fiafiaga e tataua ona auai i ai le Autalavou ao faagasolo aso fiafia.

Ia manuia le Mataupu.

Faamanatu: Ia fiafia mo le Pepe o le Kerisimasi.

Aso Sa: 13 Tesema 2020

Mataupu: O LE A SAU MEAALOFA MO LE PEPE O LE KERISIMASI?

E manatu e tele meaalofo faaletino ua saunia mo nei aso fiafia. O le fesili ua fai ma manatu autu, o se toe faamanatu, poo a ni mea aoga ua maua mai tatou mataupu o lenei tausaga. E manatu, o se meaalofo taua lea mo le pepe o le Kerisimasi, e ui e taua uma lava meaalofo. Ao lo tatou manatua o ni mea aoga sa aoaina mai le Tusi Paia e ala i a tatou Mataupu faale-Autalavou, o le meaalofo sili lea mo Iesu i lenei foi tausaga. Ia manuia le feagai ai ma le faamanatuina o le Kerisimasi ma ia maua se Tausaga Fou Manuia.

O le mataupu o lenei aso, o le fesili tatou te talatalanoa ai ma faasoa poo a ni tatou meaalofo ua saunia mo le pepe o le Kerisimasi.

E fautuaina le tuu pea o le avanoa i sui taitasi e faaali ai finagalo e uiga i le fesili.

Ia manuia le mataupu. Manuia le Kerisimasi ma le Tausaga Fou
